

**Naul nga Pol Muli Womue  
tevi Kalesia Nir renge  
KORIN  
Batu nale nga mivsivseni lut  
nga parmeteni naul ngel  
puto suri**

Naul (leta) nga Pol muli womue van ji kalesia ne Korin nir, oli suri nanu lele elep arok-imare re mauren se kalesia nir ie, ko owra piwilwil se nir. Pol ko evi m̄erwomu nga mian Korin, ko ololi womu m̄eri Korin nir arivi kalesia.

Korin evi ngaim nga milep se m̄eri Gris nir ko evi kele ngaim womu ne vanu ngok Akaea nga Rom mimetmete. Jinibb ne vanu lele elep arlik ie, ko evi kele lat nga jinibb elep marongwose re devjen ne bisnes, ko re devjen ne kastom ser kele, ko re devjen ne murrun nga m̄isij kele, ko re kele sel nga marloli nosrövien van ji atua lele nir.

Nanu nga marlelep nir nga Pol m̄ijilwer suri renge naul ngel arirpel: os̄pe suri murrun nga kalesia nir marok-sisamis e, ko murrun nga marok-loli m̄isij tevi nesevin. Nir arsusi womu pa nanu sopor tevi Pol, ko renge naul ngel ni erij welir, ko os̄pe murrun ne totkoien, ko piprese re nanen nga jinibb marlai tevi atua m̄inij nir. Ko eviseni sel mawos nga parvijuri re Naim On re daron nga markorti, ko derteren nir nga Nem̄in

On m̄ilai tevi kalesia nir, ko murrun nga jinibb pimaur luwi kele.

Re batun esngavöl drromon itul (13) os̄pe suri murrun nga rrapmerreni lenglengen Atua ko jinibb nir nga evi nanu nga m̄irres temijpal nga jinibb se Atua nir parvijuri.

<sup>1</sup> Inu Pol nuvi aposol se Iesu Kristo nga Atua miveruse inu, ko mimrreni ðemajing re majingen gel. Ko Sotinis nga mivi niaken se kerr,

<sup>2</sup> nomorwera erres tevi kami, jinibb nga marosuri Atua iak Korin. Kami, Iesu Kristo ololi kamon ko kamivi jinibb sen. Ko Atua everus kami nga kapkorti tevi jinibb sen m̄inij kele nir. Renge lat jijle iel ngatan, nir arlot van ji Iesu Kristo nga mivi Numal se kerr ko nga mivi Numal se nir kele.

<sup>3</sup> Ngel evi loten suk, nga Atua Tata se kerr tevi Numal Iesu Kristo porwilwil se kami renge nalol nga m̄irres, ko porlingi demat puto tevi kami tetajer.

### *Pol owra erres tevi Atua*

<sup>4</sup> Tetajer nomok-werai erres tevi Atua suri kami, renge nalol nga m̄irres nga ni m̄ilai nga muloli kamkorti pa tevi Iesu Kristo.

<sup>5</sup> Ko suri gortien se kami tevi Kristo ololi kamasasi renge norongwosien, ko kamrongwose kapwer rrerrarre nanu jijle puto limjer.

<sup>6</sup> Nale nos̄pen nga marsūpe suri Kristo evini pa oto eterter renge kami,

<sup>7</sup> ololi kamlai merrenien elep ji Nem̄in On daron nga kamok-tirive Iesu Kristo Numal se kerr pia-rremali vini.

<sup>8</sup> Ni purrul totkoni kami ãiterter nga sete nanu san ãisij re kami, pianan pijpari nabong nga Numal se kerr Iesu Kristo pia-luwi kele ren.

<sup>9</sup> Atua nga miveruse kami ko mukortoni mauren se kami tevi mauren se Iesu Kristo Numal se kerr, okloli suri erpe nale sen muwrai tetajer.

### *Kalesia nir arwirr sarrsarr*

<sup>10</sup> Renge nise Iesu Kristo Numal se kerr, inu nuwrai eterter tevi kami tasik nir, nga wurru kapivi sansane kobbong. Sete erres kapwij sarrsarr van renge gortien wowarreng nir. Murru kami ko norrormien se kami pivi sansane kobbong.

<sup>11</sup> Suri metka se Kloe sopor arwera tweni tevik nga kami kamok-latlat lululweni kele kami.

<sup>12</sup> Nuwrai erpok suri kami sisamis kamsuþe nale sisamis ñinij. San ok-wera, “Nuvijuri Pol”, ñinij ok-wera “Nuvijuri Apolos”, san kele ok-wera “Nuvi se Pita”, ko sopor kele arok-wera “Namivi se Kristo”.

<sup>13</sup> Erpese? Kami kamrrorrmimi kamrongwose kaptor otvi Kristo pirpok ngok? Kamrrorrmimi inu Pol numij renge nai pelaot nga bewilwil se kami? Kami sete kampaptaes renge inu nisek, ejki!

<sup>14</sup> Nuwrai erres tevi Atua nga inu sete nupaptaese rragrrag kami san, ko Krispas ko Gaius kobbong.

<sup>15</sup> Niko sete san orongwos puwra “Renge nise Pol arpaptaese inu.”

<sup>16</sup> O, ko nupaptaese kele Stepanas tevi metka sen kele nir, ko nurrleuge, nupaptaese kele san rreknga ejki.

<sup>17</sup> Kristo sete okoni inu nga bepaptaese jinibb nir, ko okoni inu nga bowrai tweni nospen nga mirres sen. Ko sete okoni inu nga bewerwer renga nale norongwosien se jinibb, ejki, ngok puloli mijen se Kristo renga nai pelaot pivi nanu nawon.

*Kristo, derteren ko norongwosien se Atua*

<sup>18</sup> Nale nga muwrai tweni mijen se Kristo renga nai pelaot evi nale lenglengen kobbong ji jinibb nejikien. Ko tevi kerr nga Atua mok-la mauren tevi kerr, nale nen eviseni derteren sen.

<sup>19</sup> Ko Naul On se Atua owrai owra 'Norongwosien se jinibb nga marwera marongrongwos, inu bololi parijiki jer. Ko norrorrmien ne norongwosien bololi parivi nanu nawon.'

<sup>20</sup> Jinibb ne norongwosien nirbe? Nibeni jinibb nga marongrongwos? Nibeni jinibb nga marokrij melmelas suri nanu ne iel ngatan nir? Arjiki rres. Atua ololi pa norongwosien ser pivini pivi nale lenglengen vajin.

<sup>21</sup> Atua, norongwosien sen elep pelak, ko ololi jinibb sete arongwos parongwose Atua renga sel ne nir norongwosien ser. Ko emrreni puloli nale nga rramok-werai tweni ngok, nga jinibb marwerai evi nale lenglengen, nale nen ko pila mauren tevi nir nga marosuri ni.

<sup>22</sup> Meri Isrel armerreni wor parlesi renga meter majingen nga marinijnij nawone se Atua, ko meri Gris armerreni parunge nale norongwosien.

<sup>23</sup> Ko kerr ma kalesia, rramok-werwer suri Kristo nga marevji re nai pelaot. Nale ngok, meri

Isrel nir nolor sete erres suri, ko jinibb ne vare nir arunge erpe nale lenglengen kobbong.

<sup>24</sup> Re ma kerr korti, m̄eri Isrel ko m̄eri Gris nga Atua miveruse kerr, Kristo ngel evi derteren se Atua ko norongwosien nga milep se Atua.

<sup>25</sup> Murrun se Atua nga jinibb m̄ilesi mivi lenglengen, ni kele easi wor norongwosien se jinibb. Ko murrun se Atua nga jinibb marlesi derteren nen mijkie, derteren nen elep kele wor easi derteren se jinibb.

<sup>26</sup> Tasik ko jojik nir, kaprrormi ta daron nga Atua miveruse kami, kamivi jinibb sev ko? Renge no jinibb nir sete kami elep kamrongrongwos, sete kami elep derteren se kami otoa, ko sete kami elep kamivi jinibb nga marlelep.

<sup>27</sup> Ko Atua otobbobbue nanu nga jinibb ne iel ngatan marwerai evi lenglengen, puloli nir nga marongrongwos parmanun. Ko otobbobbue nanu nga jinibb ne iel ngatan marok-werai nga derteren nen ejkie, puloli nir nga derteren ser martoe parmanun.

<sup>28</sup> Ko otobbobbue si nga jinibb ne iel ngatan marlesi erpe niser ejkie, ko otobbobbue sev nga jinibb ne iel ngatan marlesi arivi nanu nawon, nga puloli sev nga nir marlesi arivi nanu nga marlelep parini vajin parivi nanu nawon.

<sup>29</sup> Ngok niko sete jinibb san orongwose p̄irij melmelas renge no Atua.

<sup>30</sup> Ko kami, Atua okortoni pa kami tevi Iesu Kristo, ko elngi Iesu nga pivi norongwosien se kerr. Ololi rramon ko rramivi jinibb sen, ko owli tweni kerr rramasi pa renge nololien nga marok-kai totkoni kerr.

<sup>31</sup> Ko erpok, erpe Naul On muwrai, 'Jinibb nga mimrrreni ĩirij melmelas, ĩirij melmelas bbong suri nanu nga marres nir nga Numal muloli tevi ni.'

## 2

### *Pol owrai tweni mijen se Kristo*

<sup>1</sup> Tasik ko jojik nir, nuvinuk ji kami seveling pa iok nga bowrai tweni norrorrmien se Atua nga womu miteptepi. Sete nuvinuk nga bowrai tweni renge rijen melmelas rrek renge nale norongwosien se jinibb, ejki.

<sup>2</sup> Ko daron nga meptevi kami, nuloli norrorrmien suk nga bemalie nanu jijle, ko nanu sansan kobbong bosĩe suri, evi Iesu Kristo, tevi mijen sen renge nai pelaot.

<sup>3</sup> Re wosenen derteren suk ejki rrese, tetajer numtutu ko nuririr.

<sup>4</sup> Ko werweren suk sete eplari renge norongwosien se jinibb nga pirvei kami ren, ejki. Ko werweren suk evi nga piviseni derteren ne Nemĩn On,

<sup>5</sup> nga puloli batu nosurien se kami sete puto renge nale norongwosien se jinibb, ko puto renge derteren se Atua kobbong.

### *Nemĩn se Atua okloli rramrongrongwose norongwosien se Atua*

<sup>6</sup> Ko ewretun, kem namok-wer visviseni nale norongwosien tevi nir nga nolor mĩitra pa renge mauren ne kalesia. Ko sete evi norongwosien nga mivi ne iel ngatan, rreknga derteren ne iel

ngatan san, ejki. Derteren ngok nir para-jijki ko para-sij nabong sapon.

<sup>7</sup> Ko norongwosien ma nga kem namwera tweni ngok, Atua sansan kobbong orongwose, ko esilveni nga jinibb nir sete parongwose. Evi norrorrmien nga Atua murrormi ko pa nga pia-susi kerr van mare, mian ko mia-loli iel ngatan.

<sup>8</sup> Jinibb nga marlelep ne iel ngatan san sete orongwose norongwosien ngok. Ko poro parongwose, setemun mara-revji Numal ne melrin renga nai pelaot. Ko sete artor sweri norongwosien ngok.

<sup>9</sup> Ko Naul On owra 'Atua elngi lilane nanu elep oto metmet tweni nir nga marmerreni ni milep. Setewor jinibb arlesi nanu ngok nir renga meter, setewor arunge nale ner renga boror, ko setewor arrormi nir renga norrorrmien ser, ejki wor.'

<sup>10</sup> Ko Atua elai Nemñin On sen nga piviseni nanu ngok nir tevi kerr. Nemñin On sen ngok orongwose ðiskai nanu nga miteptepi. Norrorrmien se Atua nga jinibb sete murongwose ðiskai, ko Nemñin On orongwose ðiskai kobbong.

<sup>11</sup> Ko evi nemñi jinibb kobbong nga muto renga ni, orongwose piviseni nga mñernen erpese. Ko erpok kele, Nemñin On se Atua kobbong orongwose puwra tweni kele nga Atua erpese.

<sup>12</sup> Ko kerr kalesia, Nemñin nga rramlai pa sete evi nemñin nga miplari iel ngatan, ejki. Evi Nemñin nga Atua mukoni vini nga puloli rraprongwose nelaien nga marres nir nga Atua mñilai tevi kerr.

<sup>13</sup> Ko erpok, nale nga namrij renga sete eplari renga norongwosien se jinibb, ejki, ko namlai

nale nga Nem̃in On mivisviseni kem e. Ko namok-werai tweni nale weretunen sen reнге nale nga m̃ilai tevi nir nga Nem̃in sen m̃ilik renger.

<sup>14</sup> Ko si nga Nem̃in On sete m̃ilik rengen, sete orongwose p̃ilai derteren lele nga Nem̃in On m̃ilai. Ko m̃ernen meten orrorr nga sete mia-rongwose nanu nen nir, elesi erpe arivi nanu ne lenglengen, suri Nem̃in On kobbong orongwose puloli jinibb purongwose nanu nen nir.

<sup>15</sup> Ko jinibb nga Nem̃in On se Atua m̃ilik rengen orongwose sev nga m̃irres ko sev nga m̃isij, ko sete jinibb m̃inij san orongwose puwra suri jinibb nga mirpok san.

<sup>16</sup> Erpe Naul On muwrai, 'Sete san orongwose norrorrmien se Atua, sete san orongwose p̃isesre ni.' Ngok ewretun, ko kerr rramlai pa norrorrmien se Kristo osuw.

### 3

#### *Jinibb se Atua*

<sup>1</sup> Ko tasik ko jojik nir, rijen nga m̃elai tevi kami seveling nga daron nga m̃elik tevi kami, sete erpe rijen nga moro b̃elai tevi nir nga Nem̃in m̃ilik renger, ejki; nurij tevi kami erpe kami kamivi malum jinibb nawon ne iel ngatan, rrek erpe bipiwarreng nga mara-iak reнге kalesia nosurien ser.

<sup>2</sup> Erpe kamsus malum, ko sete nurongwose b̃elai nanen nga m̃iterter tevi kami, suri sete kamvitere. Ko kamirpok malum ejpari lelin-genok.



<sup>3</sup> Suri murru kami evijuri malum murru jinibb ne iel ngatan. Lol leplep muto renge kami, ko kamok-latlat lululweni kami. Ko ngok eviseni nga kamirpe malum jinibb ne iel ngatan, ko kamvijuri murrun ne iel ngatan, ko kamlik malum erpe jinibb ne iel ngatan marlik.

<sup>4</sup> Daron nga kami sopor marwera, “Namvijuri Pol”, ko m̄inij kele marwera “Namvijuri Apolos”, ngok kamirpe jinibb mawos ne iel ngatan ko pa.

*Jinibb ne majingen se Atua, majingen ser*

<sup>5</sup> Kaplesi. Apolos evi si? Ko inu Pol nuvi jinibb si? Komru kes nomorivi bbong jinibb ne majingen se Atua ko, nga nomorpitevi kami vini kamosuri Kristo. Kerr sisamis okloli majingen ngok bbong nga Numal m̄ilai tevi nga puloli.

<sup>6</sup> Erpe inu m̄eli dan ko morwi jelangin, ko Apolos evsi jelangin nen nir. Ko Atua kobbong ololi jelangin nen marmera m̄irres.

<sup>7</sup> Jinibb nga murwi ko jinibb nga mivsi orivi nanu nawon kobbong, ko batu majingen ngok oto ji Atua; suri ni ololi jelangin emra ko wenen otoa.

<sup>8</sup> Ko inu nga merpe jinibb nga murwi jelangin, ko Apolos nga mirpe jinibb nga mivsi jelangin ngok, nomorsorsan kobbong; ko Atua pia-wuli komru pusorsan tevi majingen nga nomorloli.

<sup>9</sup> Erpe komru nomorkorti tevi Atua nga noborloli majingen sen. Ko kami kamirpe orsel se Atua, ko kamirpe kele naim san nga ni m̄imajinge.

<sup>10</sup> Ko numajing suri ko wor derteren nga Atua m̄ilai tevik, ko numajing erpe metusu rrek

jinibb nga mokmajinge naim, ko nuli nabur nen. Ko jinibb m̄inij evini etajer tevi majingen nen. Ko jinibb si nga m̄itajer renge majingen nen purongwos wore, ko pimetmet p̄irres erpese nga m̄imajing renge naim ngok.

<sup>11</sup> Suri Atua elngi pa Iesu Kristo erpe esan rres kobbong nga mivi nabur nga murrul totoni naim m̄iterter, ko nabur nga mirpok ejki kele mun nga marongwose parili.

<sup>12</sup> Renge naim ngok, sopor arongwose parma-jinge renge narrong, jeli, ko niat nga m̄irres, nga puloli puto pipriv. Ko jinibb sopor ma parlai nevnu, wirip, ko botrro.<sup>A</sup>

<sup>13</sup> Ko nabong nga milep se Kristo pia-viseni majingen se jinibb jikle nir limjer. Renge nabong ngok nabb pia-rrowrrow lesi majingen totoklai se jinibb nir. Daron ngok, nabb pia-viseni limjer si majingen sen erres ko si majingen sen esij.

<sup>14</sup> Poro jinibb san majingen sen erres ko otur jer malum daron nga nabb musuw e, ko morok pia-lai nowli majingen sen ko.

<sup>15</sup> Ko poro san majingen sen pia-in nivniv, ko otor jabble joron ko pa osuw; ko otomori p̄in tevi joron nir, ko Atua puloli puwlu lingi tevi nevren kiskis.

### *Kalesia nir arirpe naim se Atua*

<sup>16</sup> Rrek kami kamrongwos pae nga kami kamirpe naim se Atua nga Nem̄in se Atua m̄ilik pa re kami musuw.

---

**A 3:12** Erpe iel, Pol os̄pe nevöt, ko murrun nga nir marili naim muto suri, ko kem namrieni erpe kerr rram̄ili naim iel, nga puloli mining ne nale se Pol piplari limjer.

<sup>17</sup> Ko poro san pulokloksi naim se Atua, ko Atua pulokloksi mñernen. Suri Atua naim sen on elep, ko nik ko inu, kerr jijle rramivi naim se Atua.

*Jinibb sete ãirij melmelas suri majingen sen*

<sup>18</sup> Jinibb nga ni murrormi lweni murongrong-wose renge no jinibb nir pimetmet ni ãirres. Sete erres nga ni ãikrekrasi lweni ni. Erres ma ni pimteni lweni ni pirpe bbong lenglengen san, ko iok puloli norongwosien pivini jin vajin.

<sup>19</sup> Suri norongwosien se jinibb ne iel ngatan nir, Atua elesi arirpe lenglengen kobbong. Naul On owra ‘Atua ololi jinibb norongwosien ser arongsarr, ko aron luwi renge norongwosien ser.’

<sup>20</sup> Ko Naul On owrai erpel kele owra ‘Numal Atua orongwos pae norrormien se jinibb ne norongwosien, ko owra arivi nanu nawon kobbong.’

<sup>21</sup> Ko erpok, sete erres nga kapok-rij melmelas suri sev nga jinibb muloli, suri nanu jijle arivi se pa kami osuw.

<sup>22</sup> Inu Pol tevi Apolos ko Pita, namivi se kami. Ko iel ngatan evi se kami, ko nanu ne mauren nga mñirres ko derteren nga kapas re mijen, ko nanu jijle nga marto pa, ko nanu jijle nga para-pelari kele, nir jijle arivi se kami.

<sup>23</sup> Ko kami, kamivi se Kristo, ko Kristo evi se Atua.

## 4

*Aposol se Kristo nir*

<sup>1</sup> Rrek erres kapmeteni kem pirpel: namivi bbong jinibb ne majingen se Kristo. Atua elngi

kem nga nabwera tweni majingen sen nga womu marto teptepi.

<sup>2</sup> Ko daron nga numal ne majingen mĩlngi majingen renge si nga pimetmete, norrorrmien nga milep evi nga mĩernen pimetmet ko wor pĩrres ko puloli suri ko wor sev nga numal sen muwrai tevi.

<sup>3</sup> Poro kapmerreni kapwer lokloksi inu, rrek poro botur renge no numal nir nga parwera suri inu majingen suk, ko sete nurrorrmi evi nanu san, ko sete numtutue. Ko inu kele sete nurongwose bowra suri lweni inu majingen suk.

<sup>4</sup> Renge inu nelesien suk numajing erres; ko sete nurongwos bowrai poro nuwretun iok rreknga ejki. Jinibb sansan kobbong pia-wera suri inu majingen suk, ngok evi Numal ne melrin.

<sup>5</sup> Ko erpok, sete erres kapwera suri majingen se jinibb san renge setewor mivi daron mawos nen. Rraptiriv ko wor pijpari daron nga Numal pia-luwi e vini. Ko ni vajin pia-la tweni norrorrmien ne nemalik nga jinibb marsilvenir parini limjer. Ko renge daron ngok, Atua puloli nise jinibb pian mare pusorsan tevi lat nga mĩrres ren.

*Meri Korin arkowkowrirelep*

<sup>6</sup> Tasik ko jojik nir, nuloli komru Apolos nomorvijuri nale ngok nir nga mowrair ngok, ko ngok kami vajin kamrongwos kaploli suri pirpe nga komru nomorloli pa. Ko niko kaprongwose vajin murrun ne nale ngel, nga muwra ‘Kaprrul totkoni ko wor nale nga maruli pa musuw’. Sete erres nga kapsurövi jinibb nga kamok-vijuri ko kaprrorrmii pĩsij suri jinibb mĩnij nir.

<sup>7</sup> Si ololi kami kaman mare re jinibb sopor? Atua kobbong, suri ni ela nanu jijle tevi kami. Niko sete erres kamsursurövi lweni kami, erpe kammeteni kami bbong kamsan kamloli.

<sup>8</sup> Ia, ko nanu jijle nga kammerreni, kamtor swerir pa osuw? Ko kamimare pa renge kalesia mauren se kami, a? Kamivi pa numal nir, a? Ko kem ejki rres wor, namto malum ngatan! O, ko poro evi weretunen kamivi numal, ko nañir pilep. Suri poro pirpok ko kem kele nabkorti tevi kami, ko kerr jijle vajin rrapivi numal nir.

<sup>9</sup> Ko nulesi Atua elngi kem aposol namvivotu jerjer. Namirpe jinibb nga marsupe suri pa musuw nga naban vajin re mijen, renge no jinibb jijle nir ko re kele no anglo nir. Namok-tur renge no anglo ko no jinibb ne iel ngatan kele nga parmeteni nekaien se kem.

<sup>10</sup> Suri namivi se Kristo, ololi jinibb armeteni kem erpe namivi lenglengen kobbong. Ko kami ma kamkorti pa tevi Kristo, ko kamwun saut pae norongwosien osuw. Kem nammelisna, ko kami ma kamterter! Jinibb arkulu wutan re kem, ko artori ma kami.

<sup>11</sup> Ko tetajer numer aji kem, ejpari lelingen ngel; ko tetajer nolo kem emesmes, ejpari lelingen ngel. Sunsun se kem armerrerrerr. Jinibb arevji kem, ko sise kem ejkie nga nablik rengen.

<sup>12</sup> Nammajng elep tevi nevre kem nga nabla nanen se kem. Daron nga jinibb marij m̄sij tevi kem, ko namrij erres bbong surir. Daron nga marloli m̄sij tevi kem, ko kem sete namloli nanu san.

<sup>13</sup> Daron nga marwer lokloksi kem, ko kem

namrres bbong tevir. Jinibb armeteni kem erpe nanu nawon kobbong, ko evini ejpari lelingenok, nir arlesi kem namirpe nubus ne iel ngatan.

*Wurru, kapvijuri murrun suk*

<sup>14</sup> Nuli nale ngok tevi kami, sete evi nga puloli kaprunge p̄isij, ejki, ko nga puloli kaprongwose. Suri kamivi natuk nga memrreni kami milep.

<sup>15</sup> Rrek delung jinibb elep wor niko nga marvisviseni kami renge mauren nga kamkorti tevi Kristo; ko jinibb sansan kobbong nga mivi tata se kami. Ko renge mauren kortien se kami tevi Iesu Kristo, inu le nuvi tata se kami nga m̄elai womu nosp̄en nga m̄irres tevi kami.

<sup>16</sup> Ko niko nuwrai eterter tevi kami nga kapvijuri ko wor murrun suk.

<sup>17</sup> Nukoni Timoti vinuk ji kami nga piwilwil se kami renge sel ngok nir. Renge kalesia mauren sen, ni evi natuk nga memrreni milep, nga mokterter renge majingen ngok nir. Ni p̄iwer visviseni kami renge murrun nga mevijuri renge mauren nga mimerr nga miplari ji Iesu Kristo. Evi murrun nga mevisviseni jinibb e nir renge lat jijle.

*Pol norrorrmien sen nga pian kele Korin*

<sup>18</sup> Kami sopor arwera “O, setemun Pol mia-vini mia-lesi kerr”, ko norrorrmien ser evan mare p̄elak.

<sup>19</sup> Ko poro pivi marongen se Numal, ko sete mia-periv, ko bevinuk ko ji kami. Ko ðelesi vajin nir nen nga nolor mian mare nga marokrij melmelas, poro derteren ser osorsan tevi nale ser.

<sup>20</sup> Suri batun vanu se Atua sete evini re rijen nawon, ko evini re derteren mawos se Atua.

<sup>21</sup> Ko kami kammerreni pirpese? Inu bevinuk ñelesi kami ko bevrrali kami? Rreknga kaplingi norrorrmien se kami nga mian mare, ko bevinuk vajin bewilwil se kami rengo murrun nga mumolmol pirpe nga memrreni kami milep.

## 5

*Jinibb nga mivi kalesia san ololi nanu nga ñisij san*

<sup>1</sup> Ko nale san errmali nga muwra san re kami ngok ololi nanu nga ñisij ñerñer. Ololi nanu nga jinibb ne vare kele nir marlesi sete musorsan. Mernen sel nga ñisij, ok-matur tevi tata sen mawos nesen sen tuwen.

<sup>2</sup> Ngok, suri sev norrorrmien se kami mokan mare ñelak? Suri sev kam-kowkowri kami? Erres ñelak ma kami kaptiing ko kaprunge ñisij suri nanu ngok. Ko erres nga kami kapwirr tweni jinibb nga muloli ñisij ñelak mirpok nga setemun pukorti tevi kami.

<sup>3-4</sup> Ko ewretun nuvel lingi kami rengo nibek, ko rengo neñik, nulik malum tevi kami rengen. Ko rengo nise Iesu Kristo Numal se kerr, nuwer lokloksi jile pa ñernen osuw rengo sev nga muloli, erpe nga inu nulik pa tevi kami. Ko daron nga kamkorti rengo nise Iesu Kristo Numal se kerr, ko inu nukorti tevi kami rengo neñik; ko rengo derteren se Iesu, ko

<sup>5</sup> kami kaplingi ñernen van rengo nevre demij. Ngok puloli niben pijijki, ko Atua ñia-la ma mauren tevi neñin rengo nabong nga vitu daron

nga Numal se kerr pia-wer sesesre lat nga puto suri tevi jinibb p̄etp̄eti nir ren.

*Kami kaplai tweni ko wor jinibb nga marloli nololien tetajer*

<sup>6</sup> Ko sete erres nga kaploli norrorrmien se kami pian mare p̄elak p̄irpok. Kami kamrongwos pae nga is beblen kobbong orongwose puloli niv p̄ipau.

<sup>7</sup> Kami kapsuw vajin re kamok-loli nololien, erpe kapwirr tweni ko pa is nga m̄itra, puloli kapirpe plaoa nga marloli niv ne nanen ne asien nga is mijki ren. Ko arevji pa Kristo erpe natu sipsip san nga marloli terai nanen ne asien e; ko niko nanu jijle oto metmet pa.

<sup>8</sup> Ko niko rraploli nanen ne asien, ko poro is nga m̄itra rreknga nololien ko murrun nga sete musorsan oto malum renga kerr, ko rrapla tweni, ko kerr rrapvijuri ko wor murrun nga muwokwok m̄irres ko mivi weretunen, puloli rrapirpe vajin niv nga is mijki ren.

<sup>9</sup> Renge naul nga moli womu pa tevi kami musuw, nuwrai tevi kami nuwra 'Sete kapkorti tevi jinibb nga marloli murrun nga m̄isij tevi nesevin.'

<sup>10</sup> Iok nuwrai bbong nir nga marwera marivi kalesia kobbong sopor ko marok-loli kele m̄isij mirpok. Suri jinibb nga sete marivi kalesia ko marok-loli mirpok owun saut. Nir nga marok-loli murrun nga m̄isij tevi nesevin, nir nga nolor mukul ko nga marmerrreni lenglengen nanu nir, nir nga marvevna, ko nir nga marlot tevi atua m̄inij nir, nir kele owun saut. Ko poro



kapmerreni sete kapkorti tevi nir ngok nabong sophon, ko kapiel lingi ko wor iel ngatan!

<sup>11</sup> Ko renga nale nga mowrai norrormien nen erpel: sete kapkorti tevi jinibb nga marwera arivi kalesia, ko marok-loli malum nololien. Poro parloli p̄isij tevi nesevin, rreknga nolor pukul, rreknga parlot tevi atua m̄inij, rreknga parok-worworsur, rreknga parok-minmin p̄elak rreknga parvevna. Sete kapan kapkorti tevi nir, ko sete kapan kaplik tevi jinibb nga marirpok nir nga kap̄aan tevir.

<sup>12-13</sup> Sete evi inu majingen suk nga bewer sesesre lat nga puto suri tevi jinibb ne vare nir; Atua ko wor puloli nanu ngok. Ko poro san nga mukorti pa tevi kami muloli murrun nga m̄isij, ko kami kamrongwos wore kapwer sesesre lat nga puto suri tevi m̄ernen. Suri Naul On owrai owra 'Kami kapkur tweni jinibb nga mok-loli nololien tetajer, nga setemun pukorti tevi kami.'

## 6

*Sete erres jinibb ne vare nir parsūpe otvi lolaren se kalesia nir*

<sup>1</sup> Kami kamok-loli erpese ko? Daron nga kami san m̄ilat tevi selen kalesia san, suri sev m̄ilai norrormien ngok tevi nir nga sete marivi kalesia nga parsūpe otvi? Suri sev sete mimrreni puloli jinibb se Atua nir parsūpe otvi?

<sup>2</sup> Rrek sete kamrongwose nga jinibb se Atua nir parwer sesesre lat nga puto suri tevi jinibb ne iel ngatan p̄etp̄eti nir? Ngok, ko poro kamrongwos kapviter nga kapwer sesesre lat nga puto suri

tevi jinibb ne iel ngatan nir, ko kamviter kele nga kapwer sesesre murrmurrun wowarreng kele pirpok.

<sup>3</sup> Rrek sete kamrongwose nga kerr rrapwer sesesre lat nga puto suri tevi anglo nir? Ko poro pirpok, ko murrmurrun wowarreng re mauren ne iel ngatan emalum kobbong nga rrapuŕe otvi.

<sup>4</sup> Ko ejki! Suri daron nga laten nga mirpok mimare, kamtur imare ko kaman kamwerwerai tasi kami tevi nir nga sete marivi kalesia, nga nir ngok ma parloli lilane.

<sup>5</sup> Wi, sete kammanun suri nanu ngok? Erpese, kami san ejki nga norongwosien sen mutoe, nga murongwos puloli lilane laten ngok nga jinibb mĩlat tevi tasin kele?

<sup>6</sup> Sete erres nga kalesia eru porij latlat reнге kot nga jinibb ne vare nir parwera suri lat nga puto suri tevi nuru.

<sup>7</sup> Ko nga laten nga marirpok nir arto re kami eviseni limjer nga kamvitan pa osuw. Suri sev sete kamrongwos kaplinglingi kobbong san nga muwra puloli pĩsij tevi kami? Suri sev sete kamrongwos kaplinglingi kobbong san nga muwra pĩkrekrasi kami?

<sup>8</sup> Ko ejki ma! Suri kami kobbong kamok-loli esij. Kami kobbong kamok-kerkerasi jinibb, ko sete jinibb nawon nir, ko jinibb nga marivi kalesia tasi kami.

<sup>9</sup> Kapmetmet! Suri kamrongwos pae osuw nga jinibb nga marok-loli mirpok sete mara-sil van loloim reнге batun vanu se Atua. Sete kaprongsarr reнге norrormien. Jinibb nga

mok-ojoi nesevin, ko jinibb nga moklot tevi atua ñini, sete orongwos pian loloim rengo batun vanu ngok. Jinibb nga mimatur tevi nesen se jinibb ñini, ko nesevin nga muloli ñisij tevi diwen sen, ko norman nga mok-matur tevi norman ñini kele, ko nesevin nga mimatur tevi nesevin ñini kele, sete arongwose paran loloim rengo batun vanu se Atua.

<sup>10</sup> Jinibb venao, ko jinibb nga mimreni nanu milep, ko jinibb nga mok-minmin ko batun ñilengleng, ko jinibb nga moklokloksi nise jinibb ñini kele, ko jinibb nga muloli murrun lele nga pivnae nevöt rengen, sete mia-van loloim rengo batun vanu se Atua.

<sup>11</sup> Tuwi kami sapor arirpok, ko lelingenok Atua errawe tweni nololien se kami ko ololi kamwokwok. Ololi kamon ko kamivi jinibb sen. Ololi kammomsawos erres rengo non suri nise Iesu Kristo Numal se kerr, ko rengo Nemñin se Atua se kerr.

*Kami kapmetmet nibe kami nga kapsusi nise Atua van mare*

<sup>12</sup> Jinibb sapor arwera “O, erres kobbong nga rraploli nanu ñetñeti nir”. Erres, ko sete nanu jijle nga kerr rramres ren. Rramrongwose rrapwera “O, erres kobbong nga rraploli nanu ñetñeti nir”, ko sete rrapmarong te nga nanu ngok nir san pirvei tweni norrorrmien se kerr, ejki rres.

<sup>13</sup> Jinibb sapor arwera “O, nanen evi nga pusongni depai kerr, ko depai kerr evi nga ñilai nanen.” Ewretun, ko nanu ngok korti nuru, pian ko pora-suw nga Atua pia-lai tweni nuru. Ko

erpok kele, nibe kerr sete evi nga rrapoji nesevin e, ko evi nga rrapori puon nga rrapsturövi Atua rengen, ko Atua pilai sev nga nibe kerr mimrreni.

<sup>14</sup> Atua esa raji Numal Iesu renge mijen, ko renge derteren sen kele ni pia-loli kerr kele rrapa-maur luwi kele renge mijen.

<sup>15</sup> Kami kamrongwos pae nga nibe kami erpe murrmurru nibe Kristo. Ko erpok, sete nurongwos bean bematur tevi nesevin ne sel. Kami kamrrormi erres nga parkortoni murrmurru ne nibe Kristo san tevi nesevin nga mirpok? Ejki rres nawon!

<sup>16</sup> Ko kami kaprongwose ko wor nga daron nga jinibb san mian mimatur tevi nesevin ne sel san, nuru orirpe nibe jinibb sansan kobbong. Ngok erpe nga Naul On muwrai muwra 'Nuru korti, nibe nuru pivi sansane'.

<sup>17</sup> Ko si nga mukortoni mauren sen tevi Numal se kerr, ko nuru ngok erpe evi sansane ko pa.

<sup>18</sup> Setemun kaploli murrun nga m̄isij tevi nesevin. Nololien lele nga jinibb muloli sete olokloksi niben, ko daron nga jinibb muloli m̄isij tevi nesevin, ololi esij ko pa tevi niben, erpe olokloksi niben pa.

<sup>19</sup> Erpese sete kamrongwose nga nibe kami evi naim se Nem̄in On? Nem̄in ngok, Atua elai pa elik tevi kami osuw, ko oto vajin ji kami. Ko niko nibe kami sete evi se kami, ko evi se Atua vajin.

<sup>20</sup> Suri Atua owli tweni pa kami osuw. Ko ngok kapmetmet nibe kami ko wor renge sel nga pususi nise Atua pian mare.

## 7

*Arsusi rongornge totkoien*

<sup>1</sup> Nuwra bowrai vajin tevi kami suri sev nga kamsusi daron nga kamulul vini jik. Ewretun, jinibb nga sete m̄itkai nesevin ololi murrun nga m̄irres p̄elak.

<sup>2</sup> Ko suri jinibb elep arok-loli esij, erres ma nga norman, nesen sen putoe, ko nesevin, diwen sen putoe.

<sup>3</sup> Ko norman pukorti ko wor p̄irres tevi nesen sen renge murrun nga musorsan ne totkoien nga morlik korti rengen, ko nesevin kele puloli p̄irpok kele tevi diwen sen.

<sup>4</sup> Ko sete nesevin kis emetmete niben, ko diwen sen kele.

Ko renge murrun ngok kele, sete diwen sen emetmet kis ni niben, ko nesen sen kele.

<sup>5</sup> Sete kopor-musmuse kamru lululwi tevi kamru. Ko poro kamru korti komor-marong, orongwos kopor-ivel ngangasu mun kamru sapon nga kopor-lot mun sapon, ko erres, mian ko vitunen kopora-vini ko wor nga kopora-korti luwi kele. Poro pijki ko demij orongwose p̄iskai sel nga p̄ikrekrasi kamru rengen, suri sete komor-terter.

<sup>6</sup> Nale ngok nga mowrai tevi kami sete nuwra nga kaptotko ko wor, ko nuwra bbong nga poro p̄irpok kamtotko, ko kapvijuri lat nga mowrai ngok.

<sup>7</sup> Poro jinibb jijle sete partotko, ko p̄irpe inu kobbong, ngok erres p̄elak. Ko Atua elai derteren lele tevi jinibb. Elai derteren ne norrorrmien tevi san nga puloli nanu san, ko elai derteren ne norrorrmien tevi san nga puloli nanu san.

<sup>8</sup> Ko tevi nir vajin nga sete martotko wor, ko tevi nir nga diwen ser marmij lingir, nuwrai tevi kami, erres nga kami kaplik pirpe inu kobbong.

<sup>9</sup> Ko poro kami san purnge nga nolon mimrreni lenglengen wor nga putotko, ko erres, putotko. Erres nga putotko asi nga poro ãilik nawon ko tetajer nolon ok-venae nesevin.

<sup>10</sup> Ko norrorrmien san ngel, sete evi nga inu kis ko evi se Numal, ko pian ji nir nga martotko pa musuw. Ko owrai owra 'Nesevin sete ãilinglingi diwen sen.

<sup>11</sup> Poro nesevin ãilinglingi diwen sen, ko ãilik nawon pirpok, nga sete putotko kele; rrek poro pijki ko pulwi ma pukorti tevi diwen sen kele. Ko norman sete ãilngi kurtweni nesen sen.'

<sup>12</sup> Tevi kami m̃inij nir vajin, ngel evi norrorrmien suk lebbong, sete evi se Numal: poro kalesia norman san nesen sen otoa nga sete mivi kalesia, ko vinnen emarong nga ãilik tevi m̃ernen, m̃ernen sete ãilngi kurtweni.

<sup>13</sup> Ko poro kalesia nesevin san ototko tevi norman nga sete mivi kalesia, ko m̃ernen emarong nga ãilik tevi, vinnen sete ãilingi kurtweni.

<sup>14</sup> Suri norman nga sete mivi kalesia ngok, on re no Atua daron nga mukorti m̃irres tevi nesen sen; ko nesevin nga sete mivi kalesia ngok kele, on kele re no Atua daron nga mukorti m̃irres tevi diwen sen. Poro sete pirpok, ko bipi se kamru nir parirpe bipi ne vare kobbong. Ko ejki, bipi ngok aron vajin.

<sup>15</sup> Ko poro nuru tuwen nga sete evi kalesia owra pivel lingi nuru tuwen nga mivi kalesia,

ko kalesia nen sete p̄iwer ore, p̄ilinglingi kob-bong. Ko kalesia norman rreknga nesevin ngok pimarong bbong nga pivel lingi, sete nolon p̄isij tevi suri. Suri Atua everus kerr nga rraplik rengen liken nga mumolmol m̄irres.

<sup>16</sup> Poro nik kuvi nesevin san, ko suri sev kurrormi nga sete kurongwose kuplai se diwen som nga nabong san pivini pivi kalesia? Ko poro nik kuvi norman san, ko suri sev kurrormi nga sete kurongwose kuplai se nesen som nga nabong san pivini pivi kalesia?

*Kaplik pirpe nga Atua miveruse kami*

<sup>17</sup> Kerr sisamis purrul totkoni ko wor p̄irres murrun nga Numal Atua m̄ilai tevi kerr daron nga miveruse kerr, ko rraplik malum rengen liken nga rramlik pa ren womu. Ngok evi nale nesesreien nga nomok-visviseni tevi jinibb nga marok-korti rengen Naim On jijle.

<sup>18</sup> Poro jinibb san pian pa re bae daron nga Atua miveruse, ko sete erres nga ni pian puloli lesi p̄irieni kele nanu ngok. Ko poro san setewor ean re bae daron nga Atua miveruse, ko sete ni pian re bae kele.

<sup>19</sup> Suri poro jinibb pian re bae rreknga poro sete pian, osorsan kobbong, evi nanu nawon. Ko nanu nga milep nen evi nga jinibb pivijuri ko wor nesesreien se Atua.

<sup>20</sup> Ko poro rrapivi demij maur rreknga jinibb nga mivel sisarow daron nga Atua miveruse kerr, ko erres nga rraplik pipok kobbong.

<sup>21</sup> Rrek kuvi demij maur se jinibb san daron nga Atua miveruse nik, ko erres kobbong, sete

kuprrormi. Ko poro sel san oto nga kurongwos kupini kupivi jinibb nga mivel sisarow, ko erres, kuplai, ko kupiel sisarow vajin.

<sup>22</sup> Daron nga Kristo miveruse jinibb san nga mivi demij maur, ni erpe evel sisarow ko vajin reнге Kristo. Ko erpok kele, poro Kristo piveruse jinibb san nga mivel sisarow, ko m̄nren pivini ko vajin pirpe demij maur se Kristo.

<sup>23</sup> Ko reнге iok, Atua owli tweni pa kerr osuw, ko sete emrreni nga rrapini rrapivi kele demij maur kele suri murrun nir se jinibb.

<sup>24</sup> Ko niko, tasik ko jojik nir, reнге kalesia mauren se kerr, kerr sisamis p̄ilik malum ko wor reнге liken nga m̄ilik ren womu, daron nga Kristo miveruse.

*Arsusi suri sel se nir nga sete martotko ko nir nga diwen ser marmij lingir*

<sup>25</sup> Ko kamsusi kele suri nir nga sete martotko wor. Sete nutor sweri nale san nga miplari ji Numal se kerr nga musp̄e suri. Ko bowrai bbong norrrormien suk. Ko suri Numal se kerr okwilwil se inu reнге nolon nga m̄irres, ko kaposuri ko wor nale suk.

<sup>26</sup> Rrek erres nga jinibb parlik suri mun marlik, suri lelingenok evi daron nga m̄iterter san.

<sup>27</sup> Nik nga kumtotko pa musuw, sete erres nga kuptor otvi totkoiен som. Ko nik nga sete kumtotko wor, sete erres nga kuptotko kele.

<sup>28</sup> Ko poro kuptajer reнге norrrormien nga kumrreni kuptotko, ko ngok sete evi nololien. Ko poro nesenwarreng san putotko, ko ngok sete evi



nololien. Ko suri nanu wowarrenc tetajer arok-vijajeng re jinibb nga martotko, niko nuwra erres nga parsan kobbong parlik.

<sup>29</sup> Tasik ko jojik nir, nale nga mowrai ngok erpel le: Suri daron setemun mia-periv, ko erres nga jinibb nga mutotko ãilik ko pa pirpe jinibb nga sete mutotko.

<sup>30</sup> Ko jinibb nga mokting, erres nga ãilik pirpe jinibb nga dengen mijki jin. Ko jinibb nga mokir, erres nga ãilik pirpe jinibb nga sete mokir. Ko jinibb nga mok-wulwul, erres nga ãilik pirpe jinibb nga nijor sen mijkie.

<sup>31</sup> Ko jinibb nga mok-majing suri norrorrmien ne iel ngatan, erres nga sete puloli nanu ngok nir parevei totkoni. Nomok-rij erpok suri otomori le pa iel ngatan tevi murrun lele nen nir parjijki.

<sup>32</sup> Inu numrreni lenglengen e nga sete nanu san pirvei tweni norrorrmien se kami. Suri jinibb nga sete mutotko orrorrmi wor elep suri majingen se Numal nga puloli Numal sen ãir rengen,

<sup>33</sup> ko jinibb nga ma mutotko ok-rrorrmi elep suri nanu ne iel ngatan, ko owra pipej sel nga puloli nesen sen ãir rengen.

<sup>34</sup> Ko norrorrmien sen ngok evijuri sel eru. Ko erpok kele, nesevin nga sete mutotko rreknga nesenwarrenc, ok-rrorrmi elep suri majingen se Numal se kerr. Emrreni nga niben tevi norrorrmien nuru korti porwokwok nga porivi se Atua. Ko nesevin nga ma mutotko ngok epejpej sel nga puloli kobbong diwen sen ãir.

<sup>35</sup> Nomok-werai nale ngok nir nga parwilwil se kami, ko sete numrreni parrowsi kami, ejki. Ko

numrreni nga kapvijuri murrun nga musorsan ko kaploli majingen se Numal nga sete norrormien san pirvei totkoni kele kami.

<sup>36</sup> Ko poro nesevin san nuru norman san orloli rijrijen nga ormerreni portotko, mian ko norrormien sapon eplari kele nga muloli porlik sisamis mun, setewor portotko. Ko mian ko poro norman nen elesi nga mokloli murrun sapon nga sete mĩrres ðelak tevi selen ngok, mian ko orrormi kele nga erres portotko, rrek erres ma portotko, erpe puto re norrormien nga ni mimrreni. Ko ngok sete evi nololien ko.

<sup>37</sup> Ko poro jinibb san niko nga selen mutoe, nga sete san owraie, ko renge norrormien sen bbong orrul totoni nolon nga sete putotko, ko norrormien sen omolmol ko setewor ololi esij tevi selen, ko ngok morok ololi erres ko.

<sup>38</sup> Berij otvi nale suk vajin: si nga mutotko tevi selen ololi erres. Ko si nga sete mutotko tevi selen ololi erres kele wor.

<sup>39</sup> Ko nesevin nga mutotko pa sete orongwose puwlu lingi diwen sen daron nga mimaaur malume, ko daron nga diwen sen mimij vajin ko orongwose pia-lik ji jinibb mĩnij. Ko diwen sen nen pivi ko wor kalesia.

<sup>40</sup> Ko renge norrormien suk, poro putur nawon ko rrek ni ðir kele wor. Nurrorrmi Nemĩn se Atua ko elai norrormien ngok tevik.

## 8

*Nanen nga marsulie van ji Atua mĩnij nir*

<sup>1</sup> Ko erpese re vison nga marsulsul lingi mijpon tevi atua ñinij nir? Erres re kerr kalesia rrapurroi, rreknga ejki? Ko nale nga kamok-werai ngok, nga kerr jikle norongwosien se kerr otoa, ewretun kobbong. Ko norongwosien ngok ololi norrorrmien se jinibb ean mare ko okowkowri e kobbong. Ko merrenien ma ololi mauren ser evini mare erres.

<sup>2</sup> Jinibb nga murrormi nawone ni orongrongwos, sete orongwos alje rragrrag nanu san renga norongwosien weretunen.

<sup>3</sup> Ko jinibb nga ma mimrreni lenglengen Atua, Atua orongwos pae ñernen erres osuw, ko evi selen nga ñirres.

<sup>4</sup> Ko erpese vajin re iok, re nanen nga marsuli van ji atua ñinij nir? Rramrongwose pa nga atua ñinij ngok nir sete arivi weretunen, ko Atua nga ma kerr rramlot tevi evi weretunen jerjer nga ñisan rres kobbong.

<sup>5</sup> Ko poro atua nga marirpok nir pilep nga jinibb marok-lot tevir nga marto mare rreknga re ngatan, ko pirpese ko? Rrek atua elep ko numal elep nga marirpok.

<sup>6</sup> Ko kerr nga rramivi kalesia rramrongwose nga Atua se kerr sansan kobbong, ngok Tata se kerr nga mauren ko nanu jikle marivel jin vini. Ko Numal se kerr kele sansan kobbong, evi Iesu Kristo nga muloli nanu jikle nir ko muloli kerr rrammaur.

<sup>7</sup> Ko sete jinibb jile arongwose nanu nga mivi weretunen ngok. Jinibb sopor nga lelingenok marivi kalesia, tuwi ko arok-lot tevi atua ñinij nir renga sia elep. Ko evini ejpari lelingenok,

daron nga marurroi nanen nen, ko arunge erpe arosuri malume atua m̃inij nen nir, suri norrorrmien ser setewor eterter, ko arunge erpe arok-loli nanu nga sete m̃irres.

<sup>8</sup> Ewretun, nanen evi nanu nawon. Nanen sete orongwose pirvei kerr nga rrapruj mori Atua, ejki. Sete rramrongwose rrapror jabble nanu san poro sete rrapurroi nanen ngok; ko erpok kele poro rrapurroi nanen ngok, sete rramrongwos rrapror sweri nanu san rengen.

<sup>9</sup> Iok ewretun ko, ko kupmetmet re nanu san ngel: Tukrroi nanen san nga marsuli pa tevi atua m̃inij, ko selem san nga nosurien sen sete eterter tilesi ko ni kele tuloli tirpok ko tivitan van re nololien vajin.

<sup>10</sup> Suri ni nosurien sen sete eterter, ko elesi nik nga tetajer komok-wera norongwosien som otoa, kukorti kele renge nanen nga marloli tevi atua m̃inij nir, ko ngok tirvei norrorrmien sen nga tuloli ni tukorti kele renge kele nanen ngok, renge norrorrmien sen nga sete m̃irres.

<sup>11</sup> Ko norongwosien som ngok tuloli vajin m̃er nga nosurien sen sete m̃iterter ngok tijijki suri, ngok tasim nga Kristo mimij suri.

<sup>12</sup> Ko renge murrun ngok, tomok-loli tisij tevi tasim ko tomok-lokloksi nga norrorrmien sen sete titerter, ko erpok tomok-loli tisij kele tevi Kristo kele.

<sup>13</sup> Poro kalesia tasik rreknga jojik orrorrmi nga ololi nololien daron nga murroi nanen nga marloli tevi atua m̃inij ngok nir, ko inu ma ejki, sete inu mea-urroi nanen ngok nabong san, suri sete numrreni bololi tasik pivitan renge nololien.

## 9

*Pol evi Aposol ko setewor ela nanu jijle nga moro pilai*

<sup>1</sup> Erpese? Kamrrorrmu inu sete nuvel sisarow? Kamrrorrmu sete nuvi Aposol? Kamrrorrmu sete nulesi metek e Iesu ngok nga mivi Numal se kerr? Erpese? Kami ko kamivi wenen rengen majingen ngok nga mololi tevi Numal se kerr.

<sup>2</sup> Rrek jinibb sopor arlesi inu erpe sete nuvi Aposol, ko kami ma ejki. Suri mauren se kami nga kamkorti pa tevi Numal se kerr eviseni erres pelak nga inu nuvi Aposol.

<sup>3</sup> Ko ngel evi weli nale suk daron nga jinibb marwera parwer lokloksi inu, nuwra:

<sup>4</sup> Erpese? Kamrrorrmu inu sete nurongwos bela nanen rreknga nuwi pivi nowli majingen suk?

<sup>5</sup> Ko kamrrorrmu inu nusan sete erres nga belesi nesen suk san nga mivi kalesia ko piptevik re nivelen suk nir, pirpe Pita, ko aposol nga ngok nir, ko tasi Numal Iesu nir marloli?

<sup>6</sup> Kamrrorrmu erres nga komru Banapas kobbong noborok-pelak nga nobor-tor sweri nijor ko nanen nir rengen mauren se komru?

<sup>7</sup> Sete pa jinibb nga mivi jinibb ne nuval san owli lweni kele sel sen nga pian pipalpal. Ko sete pa jinibb san orwi orsel san ko sete ok-an nga pilai wenen rengen orsel nen; ko sete pa san owngani nawon buluk ko sete orroi rragrrag san.

<sup>8</sup> Kamrrorrmu norrorrmien ngok eplari rengen mauren se kerr kobbong? Ejki rres. Oto kele wor rengen nale nesesreien se Moses.

<sup>9</sup> Suri Moses oli pa renge nale nesesreien nen owra 'Daron nga kamlai buluk nir nga paran parbböt jijreni batu wit nir nga parlai tutweni jelangin nir, sete kapkai totkoni jingor, ko kaploli ko wor parurroi wit ngok nir.' Erpese, Atua okrrormi buluk ko nir?

<sup>10</sup> Ejki, nale ngok ejpari kerr, ko emawose kerr. Jinibb nga murwi ko jinibb nga p̄ilai wenen, nuru korti porloli wor majingen se nuru ko, suri norrrormien se nuru oto nga pora-korti renge wenen nga pia-pelari.

<sup>11</sup> Majingen se kem erpe namruwi orsel san ji kami nga nanen nen mivi kalesia mauren. Ko erpese? Erres kobbong nga nablai nanen rres ji kami nga kaplai tevi kem nabrroi?

<sup>12</sup> Kammarong bbong nga jinibb sapor parok-la nanen ji kami, ko kem ma namivi jinibb mawos nga moro nablai nanen ji kami. Ko kem sete namloli erpok, ejki. Nammusus nabon tertere nanu pirpok, suri tulokloksi sel ne nos̄pen nga m̄irres se Kristo. Sev nanu nga murrow nga mivini, ko namwosi ko pa.

<sup>13</sup> Ko kami kamrongwos pae nga jinibb nga martori majingen renge Naim On arlai nanen ser iok. Ko jinibb nga marok-revji nanu rrum nir nga parlai van loloim renge lat ne sulsulen, arok-urroi kele sapon renge nanen ngok nir.

<sup>14</sup> Ko renge murrun ngok, Numal se kerr elngi nale, owra jinibb nga marok-werai tweni nos̄pen nga m̄irres sen, para-lai ko wor nowlir suri.

<sup>15</sup> Ko nurongwos bololi pirpok nga βelai nowlik, ko ejki, sete nuloli. Ko sete nus̄pe nowlik erpel nga bevijajenge. Rrek erres nga inu bemij

kobbong, asi nga poro san ñila tweni nanu ngel nga nurnge erres ren, nga sete marwulik re majingen suk.

<sup>16</sup> Sete nurongwose ñerij melmelas suri nomok-werwer rengo nale se Kristo. Suri ngok evi wor majingen nga bololi ko. Ko poro sete ñewerwer tweni nospen nga mĩrres ngok, ko ngok ñisij pilep re inu.

<sup>17</sup> Poro inu bbong ñelngi inu nga bololi majingen ngel, ko orongwose bowra 'O, rrek ñelai nowlik sapon rengo.' Ko suri sete inu nulngik, ko Numal suk ko wor elngi inu nga bevi demij maur sen.

<sup>18</sup> Ko nowlik evi bbong nga ñewerwer tweni nospen nga mĩrres van ji jinibb nir nga sete nir san muwli tevik. Suri sete nuloli norrormien suk nga ñelai nevöt nga moro ñelai suri nospen nga mĩrres ngok. Re murrun ngok ko pa erpe evi nowlik ren.

*Pol erpe demij maur se jinibb nir*

<sup>19</sup> Inu Pol nuvel sisarow. Sete nuvi demij maur se jinibb san. Ko inu kobbong nulngi inu nuvi demij maur se jinibb nir, nga bervei nir pilep parini parivi jinibb se Kristo.

<sup>20</sup> Nuvijuri murrun se mĩeri Isrel nir nga bervei nir parini parivi jinibb se Kristo. Ewretun sete nulik re nevre nale nesesreien se Moses, ko rengo no mĩeri Isrel nir nga marlik re nevre nale sen, inu nuloli erpe inu kele nulik rengo, nga bervei nir parini parivi jinibb se Kristo.

<sup>21</sup> Ko sete nulik ngasu re nesesreien se Atua erpe jinibb ne vare nir, ko nulik re nevre nesesreien se Kristo; ko rengo no jinibb ne vare

nir nga sete marlik re nevre nale nesesreien se Moses, nuloli erpe nga inu kele sete nulik re nevre nale nen, nga bervei jinibb ne vare ngok parini parivi jinibb se Numal.

<sup>22</sup> Ko renge no jinibb nga derteren ser mijkie, nuloli erpe inu kele derteren suk ejkie, nga bervei nir parini parivi jinibb se Kristo. Renge no jinibb lele nuloli erpe nuvijuri kele kobbong murrun nga muto jir, nga bevijuri sel totoklai nga bewilwil tama se nir sopon.

<sup>23</sup> Nuloli nanu ngok nir suri nospen nga mirres ngok, nga puloli borongwose botor sweri beblen renge nanu nga marres renge nospen nga mirres ngok.

*Rrapwolu ko wor pitertter nga rraplai nowli kerr*

<sup>24</sup> Kamrongwos pae murrun ne woluen. Jinibb elep arwolu, ko nir sansan kobbong orongwos pilai nowlin nen. Ko erpok kele, kapwolu ko wor pitertter renge woluen se kami ngok nga kaplai nowli kami nga Kristo pia-lai.

<sup>25</sup> Jinibb ne woluen orongwose piplak daron pilep ko wor nga pia-lai vajin nowlin. Ko nowlin nen puto beblen kobbong. Ko kerr ma erpe nga rramwolu tweni rraplai nowlin san nga sete miajijki nabong sopon.

<sup>26</sup> Iok ko ololi nga numrrreni bowlu nunsu wor lat nga woluen musuw e. Iok ko ololi nurpe kele jinibb san nga mian renge boksing nga sete ewirr sarrsarr nevre.

<sup>27</sup> Ko erpok nomok-rrul totoni nibek eterter erres, nga puloli nibek pumolmol ko sete pirveik van lat nga misij. Inu nuverus pa jinibb elep nga



parini parivi jinibb se Kristo, ko esij poro nga inu vajin bejijki.

## 10

*Sev nga miplari ji m̃eri Isrel tuwi evi nga puwni kerr*

<sup>1</sup> Tasik ko jojik, nuwra kaprongwose sev nga miplari ji apu se kem nir ne tuwi re daron se Moses. Nir jijle arteptepi renge namol re nabor nen, ko sete nanu san olokloksir. Nir jijle arivel bbong ßelar ko arivel otvi dis nga musongsong.

<sup>2</sup> Ko renge dis ngok rreknga nabor ngok, nir jijle arkorti tevi Moses, erpe arpaptaese kerr lelingenok rramkorti tevi Kristo.

<sup>3</sup> Nir jijle arurroi nanen ngok mana nga Atua m̃ilai tevir.

<sup>4</sup> Ko armini kele bbong nuwi sansan ngok ko nga Atua m̃ilai tevir, suri arlai nuwi rene nevöt nga milep nen. Nevöt nen erpe Kristo, nga miptevir tetajer.

<sup>5</sup> Ko nir elelep Atua sete eir rer, niko muloli armij rene lat karkar rene lolo merwer.

<sup>6</sup> Ko nanu ngok nir arivi nga parsusur metue kerr ko nga parwuni kerr. Sete erres nga nolo kerr pivnae nanu karkar nir pirpe nir ngok ne tuwi marloli.

<sup>7</sup> Sete erres rraplot tevi atua m̃inij nir, pirpe nir ngok ne tuwi sopor marloli. Naul On ospe suri nir owra 'Nir ngok aran arkorti nga maraan ko marminmin, mian ko artur mera ko arloli detnijen nga sete marres.'

<sup>8</sup> Sete erres rraploli murrun nga m̃isij tevi nesevin pirpe nir ne tuwi marloli, ko mian ko

nir evi nuvarrerleng ngavöl eru drromon itul (23,000) marmij renge nabong sansan.

<sup>9</sup> Sete erres rraprrowrrowe Numal se kerr pirpe nir ne tuwi sopor marloli, mian ko numet nir maraji pinpinir.

<sup>10</sup> Ko sete erres nga rraploli nale pirpe nir ne tuwi nir marloli, mian ko anglo nga mok-revji pini jinibb nir evini erevji pinpinir.

<sup>11</sup> Nanu karkar nga nir ngok ne tuwi nir marok-tor swerir ngok arivi nga parviseni kerr, ko aruli jiljilweren ser renge naul ngok nga puwni kerr lelingenok. Suri rrammaur jipari daron san nga otomori le pa nabong nga vitu pivini.

<sup>12</sup> Niko si nga orrorrmi otur eterter, pimetmet ko wor p̄irres nga sete pivitan kele.

<sup>13</sup> Nanu karkar nga marok-rrowrrowe kami arsorsan kobbong tevi nanu karkar nga marok-rrowrrowe kalesia jikle nir kele. Ko Atua orrul totkoni rijrijen sen, ko ni sete mia-marong nanu san nga m̄iterter p̄elak purrowrrowe kami; ko re daron mawos nga nanu nga mirpok muloli lesi nga purrowrrowe kami, Atua puloli sel san nga kami kapasi renge nanu ngok nir.

<sup>14</sup> Selek nir, sete erres kapsurövi atua m̄inij nir.

<sup>15</sup> Nomok-rij tevi kami erpok erpe kami kamrongrongwos pae, ko kaprorrmi ta poro nuwrai erres rreknga esij.

<sup>16</sup> Ko erpese renge biles ngok ne nanen se Numal nga rramwerai erres wor tevi Atua suri? Daron nga rramminmin renge biles ngok, ko rramivi sansan tevi Kristo renge drran nga

m̄iseser. Ko erpese kele renge niv ngok nga rramok-rroi? Daron nga rramurroi niv ngok, ko rramivi sansan tevi Kristo renge niben.

<sup>17</sup> Kerr elep, ko niv sansan rres kobbong. Ko kerr jijle rramurroi niv ngok, ololi erpe kerr jijle rramivi niben sansan kobbong.

<sup>18</sup> Kaprrorrmī ta murrūn ngok se m̄eri Isrel, erpese renge jinibb nga marurroi nanu rrum nir nga marevjir nga parloli sulsulen van ji Atua? Nir ngok arivi gortien sansan kobbong renge sulsulen ngok.

<sup>19</sup> Ko re devjen se nir nga marloli sulsulen van ji atua m̄inij nir, inu sete nuwra atua m̄inij ngok nir arivi Atua weretunen, ejki, ko sete nuwra viso nanu rrum nga marevjir nga parloli sulsulen van ji atua m̄inij nir evi nanu san, ejki.

<sup>20</sup> Ko norrorrmien suk erpel ma: nir arok-loli sulsulen tevi demij nir, sete arloli tevi Atua. Ko numusus lenglengen nga kapkorti tevi demij nir.

<sup>21</sup> Sete kamrongwose kapminmin renge biles se Numal se kerr ko renge biles se kele demij, ejki. Ko sete kamrongwose kaplik nga kapurroi kele nanen nga Numal m̄ilai ko nanen se kele demij, ejki.

<sup>22</sup> Erpese? Kamwera kaploli Atua nolon pileplep suri sev nga kamloli ngok? Kamrrorrmī rrek derteren se kami easi wore ni derteren sen?

<sup>23</sup> Ko kamok-wera “O, rramrongwos rraploli nanu jijle nga sete san orongwos piwer ore kerr ren.” Ewretun, ko sete nanu jijle erres nga rraploli, ko sete nanu jijle orongwose piwilwil se kerr.

<sup>24</sup> Sete erres jinibb nga mivi kalesia san pipejpej sel nga piwilwil se bbong ni rengen, ko rrappejpej ma sel nga purongwose piwilwil se sele kerr nir.

<sup>25</sup> Kamrongwos kaprroi kobbong vison nga marsulsul lingi mijpon tevi atua m̃inij nir nga kamwuli ji jinibb nga marok-wulwule, nga sete norrorrmien se kami puwlu karkar suri.

<sup>26</sup> Suri Naul On owrai owra ‘Ngatan ngel ko nanu jijle nga marto rengen arivi se Atua nga mivi Numal se kerr.’

<sup>27</sup> Poro jinibb san nga sete muosuri Atua piveruse kami nga kapan kap̃aan renge naim sen, ko erres kobbong kamrongwose kapan ko kapurroi nanu jijle nga m̃ilai nga sete nolo kami puwlu karkar suri nanen sev nga marto.

<sup>28-29</sup> Ko poro san puwrai puwra “O vison ngok evi ne nanu rrum san nga marloli sulsulen e van ji atua m̃inij nir. Sete erres rraprroi.” Ngok kapvijuri nale se morok, ko sete kapurroi vison ngok. Suri nik nolom erres bbong, ko m̃ernen ma nolon tuwlu karkar suri. Ko poro kami san pususi kele re iok, puwra “O, borroi le! Inu nuvel sisarow. Suri sev bevijuri kele norrorrmien se jinibb m̃inij?”

<sup>30</sup> Poro bowra erres tevi Atua suri nanen suk, sete san orongwose p̃iwer lokloksi inu suri nanen suk nga mowra erres tevi Atua suri.”

<sup>31</sup> Iok erres kobbong, ko nanu san ni le: sev tama san nga kamurroi rreknga kammini rrek nanu tama san nga kamloli, tetajer kapsusi ko wor nise Atua pian mare suri.

<sup>32</sup> Ko sete kapok-loli nga daron sapon m̃eri Isrel

rreknga jinibb ne vare nir rreknga jinibb ne kalesia se Atua nolor parok-sij suri murrun se kami.

<sup>33</sup> Tetajer reнге inu murrun suk nomok-þelak nga bololi jinibb nir parir bbong reнге sev nga mololi. Sete nuloli nanu nga þirres re inu kis, ejki. Nuloli nanu nga þirres re jinibb m̃inij nir nga puloli sel nga þelai mauren tevir. Ko kami kaploli surie pirpe inu mololi.

## 11

*Murrun mawos se nesevin re daron nga marwerwer e*

<sup>1</sup> Kapvijuri murrun suk pirpe nga mevijuri murrun se Kristo.

<sup>2</sup> Nusrövi kami suri kamok-rrorrm̃i tetajer inu ko kamvijuri erres nevisvisenien suk nga mevisviseni kami e womu.

<sup>3</sup> Ko numrreni kaprongwose þirres nanu san, ngel: norman ean mare wor easi nesen sen, ko Kristo ean mare kele easi jinibb jijle, ko Atua ean mare kele wor easi Kristo.

<sup>4</sup> Ko daron nga jinibb san mulot rreknga muwra tweni sev nga Atua m̃ilai tevi, ko musunsun ore batun, m̃ernen ololi Kristo non ewis ko. Suri reнге murrun se kerr, jinibb san pusunsun ore batun nga piviseni nga jinibb san ni ko nga mian mare re ni. Ko ejki, Kristo esan rres ean mare re kerr.

<sup>5</sup> Ko daron nga nesevin san m̃iwerwer rreknga mulot ko sete osunsun ore batun, nesevin ngok ololi diwen sen non ewis ko. Suri ni pusunsun ko wor, nga reнге murrun se kerr miviseni nga diwen sen ni ko ean mare easi re ni. Poro

pijki, ko erres ni pimanun pirpe nesevin san nga markiri batun mumus p̄etp̄eti. (Ngok nesevin ne sel nir arok-loli.)

<sup>6</sup> Ko poro nesevin san pumusus pusunsun ore batun, ko erres ma nga pitvei tweni jomro batun p̄etp̄eti. Ko poro pimanun nga pitvei rreknga p̄ikri pumus, ko erres ma nga ni pusunsun ore kobbong.

<sup>7</sup> Ko sete erres nga norman pusunsun ore batun, suri ni erpe Atua, ko eviseni nosrövien se Atua. Ko nesevin ma eviseni nosrövien se norman.

<sup>8</sup> Suri tuwi Atua sete elai nesevin nga muloli norman e, ko elai ma norman nga m̄imajing nesevin e.

<sup>9</sup> Ko Atua sete ololi norman nga piwilwil se nesevin, ejki. Ololi nesevin nga piwilwil se norman.

<sup>10</sup> Ko reнге iok, osorsan kobbong nga nesevin pusunsun ore wor batun ko, nga piviseni tevi anglo nir nga elik reнге nevre diwen sen.

<sup>11</sup> Renge kalesia mauren ngok, nesevin sete orongwos pisan puloli nanu san, ko norman kele sete orongwos pisan puloli nanu san. Nuru kes pormajing kokorti ko wor.

<sup>12</sup> Suri ewretun, tuwi Atua emajing nesevin re norman, ko lelingenok norman eak vajin reнге nesevin. Ko nanu jijle arpelari wor ji Atua.

<sup>13</sup> Kami kaprrormi ta, bowrai lweni kele sapon: Erres nga nesevin putur re no jinibb nir ko pulot van ji Atua nga sete pusunsun ore batun, rreknga ejki?

<sup>14</sup> Ko murru kerr muto suri eviseni nga daron

nga jomro batu norman san mipriv ðelak ko evi nanu nga m̄isij.

<sup>15</sup> Ko nesevin ma san, daron nga jomro batun mipriv, ko erres ðelak, evi nanu san nga Atua m̄ilai tevi nga pitawi ore batun.

<sup>16</sup> Ko poro sopor parmerreni parok-lat malum suri nanu ngok, ko ngel evi nale suk tevir: kem sete namok-loli murrun m̄inij kele, ko nir ne Naim On jijle nir se Atua sete arongwose parloli kele.

*Sopor arloli murrun nga m̄isij daron nga markorti re nanen se Numal se kerr*

<sup>17</sup> Ko re nanu san ngel, rrek sete bosrövi kami. Suri daron nga kamkorti lat sansan, ko liken ngok se kami sete ewilwil se kami, ko olokloksi bbong kami.

<sup>18</sup> Ko nanu nga womujnen nga nuwra bowrai erpel: nurnge nale nga daron nga kamini kamkorti lat sansan, ko kamlatlat lululweni tevi kami, ololi kamsisamis. Ko nurongwose nga nale ngok ewretun sapon.

<sup>19</sup> Ko nga kamsisamis mirpok eviseni limjer re kami sisamis si nen ololi osorsan.

<sup>20-21</sup> Ko daron nga kamkorti lat sansan nga kapurroi nanen se Numal se kerr, sete kamtori weretune, suri kamsisamis suri nanen se kami sisamis, ko sete kamtotrong suri lat nga moro kaptutweni nanen puto suri. Ko kami sopor numer eajir, ko sopor arorr elep ko arminmin elep.

<sup>22</sup> Poro kammerreni kaþaan pilep ko kapminmin pilep, rrek erres kaploli pirpok re bbong naim se kami sisamis. Suri daron nga kamaan

milep ko kamminmin milep re no tasi kami nir nga nanen ser mijkie, ko kamloli nor ewis, ko kamloli nanu nga m̄isij rengen Naim On se Atua. Ko kamwera bowra pirpese re iok? Kamwera bosrövi kami? Ejki nga ejki.

<sup>23</sup> Nale san nulai ji Numal se kerr ko nuwrai tweni tevi kami ngel: “Renge nutpong mawos nen nga martekai kerasi Iesu, ko ni elai niv

<sup>24</sup> ko otori ko olot owra erres van ji Atua ko obbri otvi, ko owra “Ngel evi nibek nga bemaronge suri kami. Kapurroi, puloli nga kapok-rrorrm̄i inu rengen.”

<sup>25</sup> Ko erpok kele, daron nga marurroi jijle niv, ko elai biles kele ko owrai owra “Biles norro ngel erpe sel nga mimerr se Atua nga drrak p̄iseser nga p̄itasi. Daron tama san nga kapok-minmin ren, kaprrorrm̄i inu tetajer.”

<sup>26</sup> Ko niko, daron tama san nga kamurroi niv ngok ko kammini norro ngok, erpe owra tweni mijen se Numal se kerr, pianan pijpari daron nga pia-luwi kele e vini.

*Kapurroi nanen se Numal rengen murr̄un nga musorsan*

<sup>27</sup> Ko niko poro jinibb san purroi niv rreknga piminmin rengen biles se Numal se kerr rengen murr̄un nga sete musorsan, ko ololi esij rengen drra ko nibe Numal se kerr.

<sup>28</sup> Ko erpok ko, erres nga jinibb pimteni lilane ni puwomu, ko pia-vini nga purroi niv ko piminmin rengen biles ngok.

<sup>29</sup> Suri jinibb nga mokaan ko mokminmin tama, orrorrm̄i ololi nanu ngok nir arirpe detnijen kobbong, ko Atua putor vitrangi ko suri.



<sup>30</sup> Niko nir milep re kami marok-mesi ko niber sete m̃iterter, ko nir elep re kami armij pa osuw suri murrun ngok.

<sup>31</sup> Poro jinibb sisamis pimteni lilane pa womu rengo mauren sen, ko sete Numal se kerr mia-tor vitrangi.

<sup>32</sup> Ko daron nga Numal se kerr mutor vitrangi kerr, ko otor vitrangi kerr nga rrapvijuri sel nga musorsan. Ko daron nga pia-wera suri lat nga puto suri tevi jinibb jikle nir vajin, ko kerr rrapasi.

<sup>33</sup> Ngok, tasik ko jojik nir, poro kapkorti lat sansan rengo nanen se Numal se kerr, kami totoklai kaplik ko wor.

<sup>34</sup> Ko poro san numer eaji, ko erres nga p̃iaan ko pa rengo naim sen, musuw ko pia-vini. Ko daron nga kapini lat sansan, ko Atua sete mia-tor vitrangi kami vajin.

Ko nanu m̃inij nen nir nga kamsusi surir, poro bea-rremali kele ji kami ko bea-loli lilaner.

## 12

### *Derteren nga Nem̃in se Atua moklair tevi kerr*

<sup>1</sup> Tasik ko jojik, inu numrreni nga kaprong-wose p̃irres murrun nga Nem̃in se Atua moklai derteren lele nga marres nir tevi kerr.

<sup>2</sup> Tuwi, daron nga kamlik malum rengo mauren nga m̃isij, atua nga sete marongwose parij nir arevei tweni kami van jir e, nga sete orongwose kapwer ore.

<sup>3</sup> Suri iok, numrreni kaprongwose lilane nale suk ngel: jinibb nga Nem̃in se Atua mokpitevi

weretunene sete orongwose puwra “O, Iesu esij.” Ko jinibb sete orongwose puwra tweni puwra “O, Iesu evi Numal suk”, poro Nem̃in On sete eptevi.

<sup>4</sup> Ko derteren lele se kerr elep, ko Nem̃in se Atua sansan kobbong nga moklai.

<sup>5</sup> Ko majingen lele kele elep nga rramok-loli, ko Numal sansan kobbong nga rramok-majing sen.

<sup>6</sup> Ko murrun lele nga jinibb p̃imajinge elep, ko Atua sansan kobbong nga mokrij renge nolo kerr jijle nga rraptajer renge majingen ngok nir.

<sup>7</sup> Atua elai Nem̃in sen tevi kerr sisamis nga kerr sisamis rrapwilwil sisamis se kerr luwi ren.

<sup>8</sup> Ko erpok, re jinibb sopen, Nem̃in ngok orongwose p̃ilai nale ne norongwosien tevi; ko renge sopen, Nem̃in ngok kele kobbong orongwose p̃ilai norongwosien nga purongrongwos.

<sup>9</sup> Ko Nem̃in ngok orongwos p̃ilai nosurien nga m̃iterter tevi jinibb sopen. Ko renge Nem̃in ngok kele kobbong, orongwose p̃ilai derteren lele nga parloli jinibb nga mimsi p̃irres luwi kele.

<sup>10</sup> Renge jinibb sopen orongwose p̃ilai derteren nga jinibb puloli nanu nga marinijnij nawone. Ko renge sopen, elai derteren nga parwerai tweni nale se Atua. Ko renge sopen, elai derteren nga parlesi wose nem̃in nga m̃isij ko nem̃in nga m̃irres. Ko renge sopen kele, Nem̃in ngok orongwose p̃ilai derteren tevir nga parij renge nale m̃inij nir. Ko renge sopen, Nem̃in ngok elai derteren tevir nga parieni nale m̃inij nen nir nga jinibb purongwose.

<sup>11</sup> Ko ngok, Nem̃in sansan ngok kobbong nga moklai derteren ngok jijle nir. Moklai derteren

lele ngok tevi jinibb jikle osorsan erpe nga ni mimrreni.

*Pol owra rrongrrongvi kalesia nir renge nibe kerr jinibb*

<sup>12</sup> Nibe jinibb sansan kobbong, ko murrmurrun nen elep. Ko murrmurrun ngok sete arsortan, ko arkorti ma nga marloli niben sansan. Ko Kristo kele erpok ko.

<sup>13</sup> Kerr jikle, m̄eri Isrel, rreknga jinibb ne vare nir, rreknga demij maur rreknga jinibb nga mivel sisarow, rramirpe niben sansan kobbong renge Kristo. Daron nga marpptaese kerr, ko Nem̄in sansan okortoni kerr, ko rramivi vajin niben sansan, ko rramok-la mauren ji Nem̄in nga sansan ngok bbong. Atua elai Nem̄in ngok kobbong tevi kerr jikle nga rraplai mauren rengen.

<sup>14</sup> Ko sete nibe jinibb murrmurrun sansan, ko elep ko wor, ko parmajing ko wor lat sansan.

<sup>15</sup> Poro ðelak purnge p̄isij renge majingen sen ko puwrai tevik puwra “O, nevrem ma emajing erres, ko inu sete nurongwos bololi majingen nga m̄irres san renge nibem”, nale ngok evi nale nawon kobbong, suri ðelak sete orongwos p̄ila tweni ni renge inu.

<sup>16</sup> Ko poro borok puwra “O, metem ma emajing erres, ko inu sete nurongwos bololi majingen san renge nibem”, erpe nale ngok evi nale nawon, suri borok sete orongwos p̄ila tweni ni renge inu.

<sup>17</sup> Ko poro nibek jikle pivi metek bbong, ko borngurnge nanu pirpese? Ko poro nibek jikle pivi borok bbong, ko bongus re nanu pirpese?

<sup>18</sup> Ko sete erpok; Atua elngi murrmurrun lele re nibe jinibb erpe nga ni murrormi.

<sup>19</sup> Poro murrmurrun lele ngok nir parsorsan, ko nibe jinibb p̄irres pirpese?

<sup>20</sup> Ko ewretun, murrmurrun lele elep reнге nibe jinibb, ko nibe jinibb evi bbong sansan.

<sup>21</sup> Ko erpok kele, metek sete orongwose p̄irij tere nevrek, puwra “O, sete numrrenim”; ko batuk sete orongwose puwrai tevi belak puwra “O, sete numrrenim”.

<sup>22</sup> ko sete erpok, ko murrmurru nibe kerr nga rramrormi derteren ner mijkie, nir majingen ser nga marlelep arto pae ko nga parloli;

<sup>23</sup> ko murrmurru nibe kerr nga rramlesir sete marres, ngok nir rramloli lilaner ko. Ko murrmurrun nga rrammanune nir, rramlavlav orer wor erres;

<sup>24</sup> Ko murrmurru nibe kerr nga rramlesir marres bbong, rramlingi kurtweni nawone nir erpok. Niko Atua okortoni murrmurru nibe kerr ngok nir, ko emrreni nga murrmurrun nen nir nga rramlesir sete marres, ko rraploli lilaner p̄irres.

<sup>25</sup> Renge murrun ngok kobbong, murrmurru ne nibe kerr sete orongwose parlatlat nir. Armetmet lululwi nir ma erres, ko arwilwil ser.

<sup>26</sup> Poro murru nibek san purnge p̄isij, ko ngok nibek totoklai purnge p̄isij. Ko poro parsurövi murru nibek san, ko ngok nibek totoklai purnge p̄irres ko wor.

<sup>27</sup> Ko erpok, kerr jijle rramivi nibe Kristo, erpe kerr sisamis rramivi murrmurrun re niben ngok.

<sup>28</sup> Ko renge kalesia, Atua elngi majingen sisamis se jinibb jijle. Womujnen, elngi aposol nir. Ko suri nen e, elngi propet nir. Ko vatolin, elngi jinibb nevisvisenien nir. Mian ko nir nga marloli nanu nga marinijnij nawone, musuw ko elai derteren tevi nir nga parloli jinibb parres luwi renge mesien, mian ko nir nga parwilwil se jinibb, mian ko nir nga marmetmete majingen ne Naim On, mian ko nir nga marongwos parij renge nale lele.

<sup>29</sup> Ko sete kerr jijle rramivi aposol, sete kerr jijle rramivi propet, sete kerr jijle rramivi jinibb nevisvisenien. Sete kerr jile arlai derteren tevi kerr nga rraploli nanu nga marlelep marres,

<sup>30</sup> rreknga rraploli jinibb parres luwi renge mesien, rreknga rraprij renge nale m̃inij nir, rreknga rrapwer tweni mining ne nale nen nir nga jinibb purongwose, ejki.

<sup>31</sup> Renge iok, kami kaploli norrorrmien se kami p̃iterter kele wor nga kaplai derteren nga marres nen nir. Ko beviseni vajin sel nga m̃irres asi san, nga boli suri ngel:

## 13

*Merrenien nga jinibb mimrreni Atua ko jinibb nir*

<sup>1</sup> Poro nurongwose berij nale jijle ne iel ngatan ko nale se anglo kele nir, ko merrenien suk mi-jkie, ko ngok nale suk evi nanu nawon kobbong, erpe naŕe nga drrelan mivijajeng nawon ko sete owra nanu san.

<sup>2</sup> Ko poro derteren suk putoe nga bowrai tweni nale nga Atua m̃ilai tevik, ko

merrenien suk mijkie, ko ngok nale suk evi nanu nawon kobbong. Ko poro norongwosien suk pilep, ko nurongrongwos nanu nga musuw ngok, ko merrenien suk mijkie, ko ngok inu sete nuvi jinibb san. Ko poro nosurien suk pilep, evter nga purujoni botwen nga marlelep nir, ko merrenien suk mijkie, ko ngok inu sete nuvi jinibb san.

<sup>3</sup> Poro ðelai nawone jorok þetþeti nir tei jinibb nga joror marjiekie nir, ko bemarong nga devje nuval nir parsulik renge nabb suri nuvi jinibb se Kristo, ko merrenien suk mijkie, ko sete mea-tor sweri rragrrag nanu san, ejki.

<sup>4</sup> Merrenien, nolon epriv, okrrorrmie elep suri jinibb, ko erres tevi jinibb nir. Sete nolon pileplep ko sete nolon pian mare þelak, ko sete pukowkowrie.

<sup>5</sup> Sete þiwer lokloksi jinibb, sete purrorrmie lweni kis ni. Sete pulolar pingavilvil, ko sete poklolar pipriv þelak.

<sup>6</sup> Merrenien sete orongwos þir renge sev nga ñisij, ko eir ma renge sev nga mivi weretunen.

<sup>7</sup> Merrenien, nolon sete orongwose pivitan nga mokwilwil se jinibb nir. Tetajer osuri Atua, ko norrorrmien sen oto eterter renge Atua tetajer; ko nekaien nga marlelep arongwose parini ren, ko nolon sete orongwose pivitan.

<sup>8</sup> Merrenien sete mia-suw nabong san. Rrek jinibb sopor derteren ser otoe nga parwerai tweni nale nga Atua ñilai; pian ko pusuw. Rrek sopor derteren ser putoe nga pariĵ renge nale ñinij; mian ko pijpon. Ko rrek sopor norongwosien ser pilep lenglengen; pian ko pijijki.

<sup>9</sup> Suri norongwosien ngok se kerr evi beblen kobbong, ko derteren nga rramwerai tweni nale nga Atua mĩlai kele evi beblen kobbong.

<sup>10</sup> Ko daron nga nanu nga musorsan mĩrres jijle pĩrmali, ko nanu nga sete musorsan p̃elak pian pijijki vajin.

<sup>11</sup> Tuwi daron nga mewelili malum e, ko rijen, norrorrmien, ko norongwosien suk erpe bipiwarreng. Ko daron nga mevini mevi jinibb vajin, ko nukurtweni murrun se bipiwarreng vajin.

<sup>12</sup> Erpok kele, lelingenok erpe rramlesi drranu oto ore malum nanu nir; mian ko nabong san, nanu jijle pia-to limjer, ko rrapa-lesi Atua mawos vajin. Lelingenok norongwosien se kerr oto re liven kobbong; ko mian ko renge daron ngok inu bea-rongwose nanu jijle pirpe nga Atua murongwose lilane inu.

<sup>13</sup> Ko niko murru sel itul oto nga sete mara-jijki. Nga womu, evi nosurien se jinibb nga muosuri Atua. Nga suri nen e evi norrorrmien se jinibb nga mĩterter renge Atua. Ko itolin evi merrenien. Ko nga mĩiasi jerjer re nir nga itul ngok evi merrenien.

## 14

### *Rijen re nale mĩnij ko rijen erpe propet*

<sup>1</sup> Kami kapp̃elak ko wor pilep nga kapvijuri sel ne merrenien. Ko kappej kele derteren nir nga Atua mĩlair; ko womunen kappej derteren nga kapwera tweni nale se Atua erpe propet.

<sup>2</sup> Suri jinibb nga m̃irij renge nale m̃inij erpe nga Nem̃in On m̃ilai, sete erij tevi jinibb, ko erij tevi Atua kobbong. Nem̃in On elai derteren ngok tevi nga puwrai tweni nale ngok suri nanu nir nga jinibb sete murongwose.

<sup>3</sup> Ko jinibb nga ma muwra tweni nale se Atua renge nale se kerr mawos, ni vajin erij erpe propet; erij limjer nga jinibb nir parongwose, ko okwilwil se nir ko osusi norrorrmien ser van mare, ololi arunge erres.

<sup>4</sup> Jinibb nga m̃irij renge nale m̃inij ewilwil sen lweni kobbong, ko jinibb nga ma muwra tweni nale nga Atua m̃ilai, renge nale se kerr jijle, ni ko vajin okwilwil se kalesia totoklai.

<sup>5</sup> Rrek p̃irres poro nga kami jijle kaplai dert-eren ne marij re nale m̃inij; ko poro kaprongwose kapwerai tweni nale nga Atua m̃ilai renge nale se kerr jijle, ko inu ðeir kele wor. Erpe poro jinibb nga m̃irij renge nale m̃inij sete orongwose p̃irieni nale nen nga kalesia parongwose, ngok erresrres jinibb m̃inij puwra tweni nale se Atua renge nale se kerr jijle, ko niko vajin pia-wilwil ser.

<sup>6</sup> Tasik ko jojik nir, p̃irres pirpese poro bevinuk ko ðerij nale m̃inij tevi kami nga setemun nuwra lilane sel nga muto suri? Nale ngok piwilwil se kami pirpese? Ko rrek p̃irres ma poro bowra mawos sev nga Atua miviseni tevik, rreknga norongwosien rreknga nevisvisenien rreknga nale kele san nga muto limjer.

<sup>7</sup> Kaprrorrmī ta nabbu nga maruwi ko gita. Nanu ngok nir arivi nanu nawon, ko jinibb kobbong ololi drrelan mutoe. Ko poro drrelar



sete ãimãerer, ko jinibb sete mia-rongwose nubo nga marlai.

<sup>8</sup> Ko poro davö paruwi sete drrelan pimãerer ãirres, ko sete jinibb san mia-rongwose nga evi daron ne nuval.

<sup>9</sup> Ko erpok kele, sete jinibb san mia-rongwose sev nga kamwerai, poro nga nosþen se kami oto tetajer reнге nale m̃inij; nale se kami pian bbong pijijki reнге mesa nawon.

<sup>10</sup> Ko nale lele elep lenglengen iel ngatan, ko nir jijle mining ner artoe.

<sup>11</sup> Ko poro sete borongwose nale se jinibb san, ko borngе erpe m̃ernen enganga, ko ni kele purnge inu erpe benganga.

<sup>12</sup> Ko erpok kele re kami, suri kammerreni lenglengen derteren nir nga Nem̃in On m̃ilair, kapp̃elak ko wor pilep nga kaplai derteren nen nir nga marwilwil se kalesia jijle nir.

<sup>13</sup> Ko niko, si nga derteren sen otoe nga m̃irij reнге nale m̃inij mirpok, pulot ko wor nga Nem̃in On ãilai derteren tevi nga purongwose kele ãirieni nale m̃inij nen.

<sup>14</sup> Suri poro bolot pipok reнге nale m̃inij san, nem̃ik kobbong olot ko norrormien suk oto nawon.

<sup>15</sup> Ko ngok, pipese ko vajin? Ko erres daron nga rramlot reнге nem̃i kerr, ko rrapkortoni tevi norrormien se kerr kele; ko daron nga rramlai nubo tevi nem̃i kerr kele, ko rrapkortoni kele tevi norrormien se kerr.

<sup>16</sup> Daron nga kumlot nga kupwerai erres tevi Atua reнге nale m̃inij san, ko jinibb nir sete

arongwose parwera “Pirpok ko!” renge loten som, suri sete arongwose nale nga kumrij e.

<sup>17</sup> Rrek loten som ngok tevi Atua erres þelak, ko sete mia-wilwil rragrrag se jinibb ngok nir.

<sup>18</sup> Nuwra erres wor elep tevi Atua nga inu nomok-rij renge nale m̃inij easi kami jijle.

<sup>19</sup> Ko re Naim On numrreni þerij e nale evis bbong nga marmumrrol nga jinibb orongwose ko nga parvisviseni nir erres, easi nga þerij renge nale puwun saut renge nale m̃inij nga marrelenge.

<sup>20</sup> Selek nir, sete kapipe bipiwarreng nir renge norrorrmien se kami. Kapipe bipiwarreng nir nga marrelenge nanu nga marsij, ko re ma norrorrmien se kami, kapipe jinibb tera.

<sup>21</sup> Suri Naul On owra ‘Inu bowrai tweni nale suk tevi jinibb suk nir, ko þerij rrurrngi nir ne nale m̃inij nir, ko þerij renge jingo neturvitan kobbong nir. Ko re sel ngok kele jinibb suk nir sete mara-murrong inu.’

<sup>22</sup> Ko erpok kele, oto limjer nga derteren ne parij re nale m̃inij evi nga piviseni jinibb nga sete marosuri Atua, parlesi wose, ko sete evi se nir nga marosuri. Ko derteren ne parwera tweni mawos nale se Atua erpe propet renge nale se kerr evi nga piwilwil se nir nga marosuri, ko sete evi se nir nga sete marosuri.

<sup>23</sup> Poro jinibb m̃inij sopor, rreknga nir nga sete marosuri Atua parini daron nga kami kalesia jile kamkorti, ko kami jile kaprij renge nale m̃inij nir, ko erpese? Rrek parwera “O, arlengleng ko!”

<sup>24</sup> Ko poro kami jile kapwerai tweni mawos nale se Atua renge nale se kerr daron nga jinibb

san nga sete muosuri Atua ãilik loloim, ko ngok enije. Ngok nale se kami jijle pujuji nolon suri nololien sen, ko piviseni kele ni, lat nga mauren sen muto suri.

<sup>25</sup> Nale se kami ngok pirvei tweni norrorrmien sen nga mokteptepi ngok pivini puto limjer, puloli mñernen pijipa vitan pusrövi Atua, puwra, “Ewretun, Atua elik liven re kami iel.”

*Parsurövi Atua renge sel nga musorsan ko wor mñirres*

<sup>26</sup> Tasik ko jojik nir, bowra sev tevi kami? Bowra, daron nga kamini kamkorti nga kap-surövi Atua, ko kami jile kamloli majingen. Rrek san evi nga ãilai nubo, ko san evi nga pivisviseni, ko san evi nga puwra tweni norrorrmien nga mñimerr nga Atua miviseni tevi, ko san evi nga ãirij renge nale mñinij, ko san evi nga ãirieni nale nen; ko kami jijle puloli wor sev nga muloli renge sel nga piwilwil se delung.

<sup>27</sup> Poro sopor parij renge nale mñinij, ko erres nga nir ãieru rreknga ãitul bbong parij. Ko san ãirij jile pusuw ko mñinij kele, ko jinibb san ãirieni nale ser.

<sup>28</sup> Ko poro jinibb san pijki nga ãirieni nale ser ne nale mñinij ngok, ko erres nga mñer nga mñirij ngok ãilik malum kobbong renge liven ne kalesia ko ãirij kobbong tevi ni lweni kobbong ko tevi Atua kele.

<sup>29</sup> Ko re devjen ne nir nga marwera tweni mawos nale se Atua erpe propet renge nale se kerr, erres poro nuru ãieru rreknga ãitul parij, ko nir mñinij nen parselepor ko parmurronge nale ser, poro osorsan erres rreknga ejki.

<sup>30</sup> Ko poro jinibb san elik nga murnge nale se Atua ko ornge nga Atua eviseni nanu san tevi, ko erres m̄er nga m̄irij pumosi mun ko p̄ilinglingi m̄ernen puwrai tweni nanu nen.

<sup>31</sup> Erpok kami j̄ijle kamrongwose kapwerai tweni nale se Atua, san pusuw, ko san. Ko renge murrun ngok puloli kaprongwose nanu, ko norrorrmien se kami pivini p̄iterter kele wor.

<sup>32</sup> Puloli propet nir parmajing tevi derteren ngok renge murrun nga musorsan m̄irres.

<sup>33</sup> Suri Atua sete evi batu sel nga m̄ikarkar, ko evi ma batu demat. Renge Naim On totoklai se Atua nir arok-vijuri murrun ngel, ko kami kele kapvijuri ko wor:

<sup>34</sup> nesevin parp̄erp̄er renge Naim On. Sete erres parij, ko parlik malum ko parosuri, erpe nale nesesreien se Moses muwrai.

<sup>35</sup> Poro nesevin san puwra purongwose nanu san, ko erres nga pususi tevi diwen sen re naim se nuru. Ko sete erres nga nesevin parij renge Naim On.

<sup>36</sup> Ko erpese? Kami kamrrorrmī nale se Atua eplari womu ji kami? Kamrrorrmī nale se Atua evini ejpari ji kami kobbong?

<sup>37</sup> Poro san re kami orrorrmī derteren sen otoa erpe propet nga puwrai tweni nale se Atua, rreknga orrorrmī Nem̄in On okpitevi ni, ko ni p̄ilesi wose kobbong nga nale nga nomok-uli tevi kami evi weretunen nale nesesreien se Numal se kerr.

<sup>38</sup> Ko poro san sete owor suri nale suk ngel, ko Atua kele sete pia-wor suri ni.

<sup>39</sup> Tasik ko jojik nir, kaplingi ko wor norror-

rmien se kami rengo derteren nga kapwerai tweni nale se Atua erpe propet. Ko sete ma kama-wer ore jinibb nga derteren sen mutoe nga p̄irij re nale m̄inij.

<sup>40</sup> Kaploli nanu jikle rengo murrun nga musorsan m̄irres nga jinibb parir rengo.

## 15

### *Kristo emaur luwi kele re mijen*

<sup>1</sup> Tasik ko jojik nir, nuwra kaprongwose suri nosp̄en nga m̄irres nga m̄ewerwer e pa tevi kami, nga kamlai pa musuw, ko nga nosurien se kami muto m̄iterter malum rengo.

<sup>2</sup> Ngok evi nosp̄en nga m̄irres nga m̄ewerwer e tevi kami. Ko Atua pia-loli nosp̄en nga m̄irres ngok pia-lai mauren tevi kami, poro kaprrul totoni p̄iterter. Poro pijki, ko rrek nosurien se kami pivi nanu nawon kobbong!

<sup>3</sup> Sev nga m̄elai, nuvijngeni tevi kami. Evi norrorrmien nga milep temijpal re nosurien se kerr, ngel: nga Kristo emij suri nololien se kerr erpe maruli pa re Naul On;

<sup>4</sup> nga artevni, ko nabong itul easi ko Atua ololi emaur luwi erpe maruli pa rengo Naul On;

<sup>5</sup> nga m̄irmali ji Pita, mian ko ji kele jinibb sen esngavöl drromon eru.

<sup>6</sup> Ko vitunen errmali ji gortien ne jinibb nir nga nir easi ongut valim (500), nga nir jikle arlesi ni. Nir sopor re gortien ngok armij pa, ko nir elep armaur malum.

<sup>7</sup> Vitunen errmali ji Jemes, ko vitunen kele errmali ji aposol sen jikle nir.

<sup>8</sup> Ko vitu jerjer errmali ji inu ngel nga sete nuvi jinibb san.<sup>B</sup>

<sup>9</sup> Nuwrai erpok suri nulesi inu nuan ngatan easi aposol m̃inij nir; ko nurnge nibek nen nga sete erres parveruse inu aposol, suri tuwi inu nomok-ojoji kalesia nir.

<sup>10</sup> Ko suri Atua ewilwil se inu renge nolon nga m̃irres, niko mewaji vajin nais ngok. Ko Atua sete ewilwil nawon se inu, ko wenen nen oto wore, ko inu numajing wor elep easi aposol m̃inij nir. Ko ewretun, sete inu ko nga m̃emajing; Atua ko nga mok-wilwil se inu renge nolon nga m̃irres sen, ni ko eptevik renge majingen ngok nir.

<sup>11</sup> Ko ngok, poro nga inu ßewerwer, rreknga nir parwerwer, ko eplari osorsan kobbong, kami kamosuri pa.

### *Jinibb se Atua para-maur luwi kele*

<sup>12</sup> Ko nospen nga m̃irres owra nga Atua ololi Kristo emaur luwi kele renge mijen. Ko ngok nale nga kami sopor kamok-werai nga nir nga marmij sete mara-maur luwi kele, sete evi weretunen.

<sup>13</sup> Poro evi weretunen nga nir nga marmij sete mara-maur luwi kele, ko pirpok ko, Kristo sete emaur luwi kele renge mijen.

<sup>14</sup> Ko poro Kristo sete emaur luwi kele renge mijen, ko nospen nga namok-werwer tweni ngok evi nanu nawon kobbong, ko nosurien kele se kami evan lat nawon.

---

**B 15:8** Iel Pol owra ni erpe bipi san nga m̃iak otvi, ko niko rrek owra puwra ni sete evi jinibb san.

<sup>15</sup> Ko ngok eviseni kele nga rramloli gerisen re Atua daron nga rramwera ololi Kristo emaur luwi renge mijen. Ko poro nga Atua sete orongwose puloli nir nga marmij parmaur luwi, ko ngok sete ololi Kristo emaur luwi.

<sup>16</sup> Suri poro nir nga marmij sete parmaur luwi, ko Atua sete ololi Kristo emaur luwi renge mijen.

<sup>17</sup> Ko poro Kristo sete emaur luwi renge mijen, ko nosurien se kami renge Kristo evi nanu nawon kobbong, ko Atua setewor etlasi tweni nololien se kami.

<sup>18</sup> Ko nir nga marosuri Atua mianan ko marmij pa musuw, aran renge nejikien ko pa.

<sup>19</sup> Poro rramlingi norrormien se kerr renge Kristo suri nowlin nga rraplai bbong iel ngatan, ko rramlik esij easi jinibb p̄etp̄eti ne iel ngatan ko!

<sup>20</sup> Ko ejki. Evi weretunen jerjer nga Atua ololi Kristo emaur luwi renge mijen. Ko renge nir nga marmij pa osuw, ni evi m̄er nga muwowomu jer nga mimaur luwi renge mijen. Ni erpe wenen san nga m̄itra womu renge naut san.

<sup>21</sup> Erpe mijen evi nanu san nga jinibb sansan kobbong, Atam, elai errmali iel ngatan. Ko mauren nga miplari renge mijen errmali kele ji jinibb sansan kobbong vini.

<sup>22</sup> Ko kerr jikle nga rrampelari renge metka se Atam, rrapan ko wor renge mijen, mian ko rrapakorti tevi Kristo nga rrapa-maur luwi kele renge mijen.

<sup>23</sup> Ko nanu nir parpelari pipel le: ni nga mimaur luwi womue evi Kristo, nga mirpe nanen nga m̄itra womu renge orsel. Ko vitunen,

re daron nga Kristo pia-rremali, ko jinibb sen vajin para-maur luwi.

<sup>24</sup> Ko vitunen, bongsi nanu jijle nir p̄irmali. Renge daron ngok Kristo pulokloksi batbatu jinibb nir ko gavman nir ko numal nga marivi se demij, para-jijki jile, ko p̄ilai lweni derteren totoklai pulwi van re nevre Atua Tata sen.

<sup>25</sup> Ko rramrongwose nga Kristo pivi Numal pian pian pijpari nga Atua p̄ilngi jile devje nuval jijle nir se Kristo ngatan ko pubbötbböt renger re ðelan ngatan.

<sup>26</sup> Musuw ko devje nuval nga vitu jer nen nga Atua pia-lingi ngatan evi mijen.

<sup>27</sup> Suri Naul On owra 'Atua elngi nanu jijle arto renge melve ðelan'. Ko nga muwrai ngok, 'Nanu jijle arto renge melve ðelan', ngok sete etawi ore Atua. Suri Atua ko elngi nanu jijle renge melve ðela Kristo.

<sup>28</sup> Ko daron nga nanu jijle parto vajin pipok re derteren se Kristo, ko vitunen, Kristo nga mivi Atua natun, ni kele kobbong p̄ilngi ni lweni van ngatan re derteren se Atua ngok nga womu m̄ilngi nanu jijle marto renge derteren se Kristo. Ko Atua vajin putori derteren renge nanu jijle.

<sup>29</sup> Ko erpok kele, poro jinibb nga marmij nir sete parmaur luwi kele re mijen, ko suri sev jinibb nir marok-lai baptaes marla wani nir nga sete marbaptaes tuwi, mian ko marmij?

<sup>30-31</sup> Ko suri sev kem namok-p̄elak tetajer nga namlokloksi mauren se kem nga otomori nabmij nabong jijle? Neiren nga milep nga muto renge inu suri kami, ko mauren nga kamlai renge Iesu Kristo, Numal se kerr, evi batun nga mowrai iok.



<sup>32</sup> Ko iel Epesas erpe inu nomok-palpal tere nanu rrum nir, ko ðelesi sev ko þirres suri renge iel ngatan? Poro nir nga marmij sete parmaur luwi kele renge mijen, ko rrek erres ma rrapvijuri norrorrmien nga muwra ‘Erres ma rraplik rraplelea rraþaan ko rrapminmin kobbong, suri mevi le pa rrapmij, ko setemun rrama-lesi kele nanu nga mïrres san.’

<sup>33</sup> Sete kaplengleng, sele kami nga murrur marsij arongwose parlokloksi kami.

<sup>34</sup> Kaploli lilane norrorrmien se kami þirres, ko kaplingi kurtweni nololien nga marsij se kami. Ko erres no kami pimanun ko pa, suri kami sopor nirko arrelenge Atua.

*Nibe kerr pia-irpese re daron nga rrapmaur luwi re mijen?*

<sup>35</sup> Ko rrek jinibb sopor para-susi nabong sapon, parwera “Jinibb nga marmij parmaur luwi pirpese?” Ko “Niber kele para-irpese ko?”

<sup>36</sup> Kamwolu lengleng! Sete kamrongwose nga drrum pimij ko wor, nga puloli drruvi nga mïrres san piplari, erpe mauren nga mimerr.<sup>C</sup>

<sup>37</sup> Ko winen nga maruwi sete evi drruvi, ejki. Drruvi evi nanu nga mïmerr taktak, ko elep ko erres þelak asi winen, nga mumutmut jile vajin.

<sup>38</sup> Atua ko ela sinan tevi drruvi nir erpe nga ni mimrreni. Ko erpok kele, oklai niben tevi nanu jijle nir.

---

<sup>C</sup> **15:36** Erpe iel, Pol osþe wit, ko kem namlingi drrum, nga puloli mining ne nale sen piplari limjer.

<sup>39</sup> Nibe nanu nir sete arsorsan. Viso jinibb sete osorsan tevi viso nanu rrum. Numön vison enije, ko mesal kele vison enije.

<sup>40</sup> Ko nanu sopor arto mare re melrin, ko nanu sopor kele arto ngatan. Ko moron ne nanu ne melrin artoe, ko moro nanu ne iel ngatan kele artoe.

<sup>41</sup> Nial sete erpe navöl ko, navöl kele sete erpe moju, ko moju sisamis arinije.

<sup>42</sup> Ko pia-irpök ko re daron nga jinibb para-maur luwi kele e renge mijen. Niben nga martevni, pian ko pupo ko pumutmut; ko daron nga para-maur luwi kele renge mijen, ko setemun mara-mutmut.

<sup>43</sup> Ko nibe jinibb daron nga rramteveni ko rramlesi esij elep, ko derteren sen ejkie; ko daron nga para-maur luwi kele renge mijen, ko niber parres ðelak, ko derteren ser pilep temijpal.

<sup>44</sup> Niben nga marmij nga martevnir arivi ne mauren ne iel ngatan kobbong; ko daron nga para-maur luwi renge mijen, ko arivi vajin nga parmaur tevi Atua. Niben ne iel ngatan otoa, ko niko niben ne mauren tevi Atua otoa kele e.

<sup>45</sup> Ko Naul On owra 'Merwomu ngok Atam, Atua ololi evi jinibb nga mñilai mauren ne iel ngatan'; ko ni nga mivi Atam nga vitu jer nen, Atua ololi evi nemñin, nga orongwose ðilai mauren tevi kerr.

<sup>46</sup> Ko sete mauren ne nemñin otoa womu, ejki, ko mauren ne iel ngatan otoa womu, mian ko mauren ne nemñin ea-to vitu.

<sup>47</sup> Merwomu, armajinge renge maw ne iel ngatan; ko mñervitu eplari re melrin vini.

48 Jinibb jijle ne iel ngatan, niber erpe niben nga marmajinge renge maw ne iel ngatan; ko jinibb jijle ne melrin, niber erpe niben nga mivel renge melrin vini.

49 Ko erpe lelingenok rramirpe m̃erwomu nen, nga mivi Atam; ko erpok kele rrapa-irpe m̃ervitu nen nga miplari re melrin vini, nga mivi Kristo.

50 Tasik ko jojik nir, ngel evi mining ne nale suk: Nibe kerr nga vison ko drra muto ren sete mara-van rragrrag renge batun vanu se Atua. Ko niberr ngel nga pian ko pimij, sete orongwos p̃ila mauren ne tuwi ngok vini.

51 Selek nir, kapmurrong p̃irres; ngel evi nale teptepi le san, bowrai tevi kami. Sete kerr jijle ko rrama-mij.

52 Ko daron nga drrela davö nga milep ne nabong nga vitu p̃iting, ko Atua p̃irieni nibe kerr jijle pivesan rrese, pirpe navil nga mivil. Suri daron nga davö ngok p̃iting, ko Atua puloli nir nga marmij parmaur luwi kele renge mijen, nga setemun mara-mij kele nabong san. Ko p̃irieni kele nibe kerr nga rrammaur malum re daron ngok.

53 Suri nibe kerr nga marok-mij, parieni ko wor nga parivi niben nga sete mia-mij nabong sapon. Ko nibe kerr nga marivi ne nejijkien, parieni ko wor nga parivi niben nga sete mia-jijki nabong sapon.

54 Ko daron nga nanu ngok nir para-rremali, ko nale ne Naul On kele p̃irrmali nga muwra 'Nanu ngok mijen, Atua olokloksi pa osuw, olokloksi jijle pa.'

<sup>55</sup> ‘E mijen, ngabe ko derteren som vajin? E mijen, erpese kurongwose kuplokloksi kem?’

<sup>56</sup> Suri nololien ko elai derteren tevi mijen nga muloli mijen orongwos pulokloksi kerr; ko nale neseseien elai derteren tevi nololien.

<sup>57</sup> Ko rramwera erres temijpal wor tevi Atua suri mukortoni kerr renge Iesu Kristo, Numal se kerr, ko tetajer ololi rramok-asi.

<sup>58</sup> Ko ngok, tasik ko jojik nga marres p̃elak, kami kaptur ko wor p̃iterter, sete kapririr. Tetajer kapmajing ko wor p̃iterter renge majingen ngok se Numal se kerr. Ko kamrongwose pae nga daron nga kammajing se Numal se kerr, ko majingen ngok wenen puto wore ko.

## 16

### *Merrenien nga piwilwil se kalesia nir ne Isrel*

<sup>1</sup> Ngok, ko daron nga kamtuwtuw nevöt suri jinibb se Atua nir, ko numrreni kaploli pusorsan pirpe sev nga mowrai tevi kalesia nir ne Galesia.

<sup>2</sup> Ko ngok evi nga re nabong on jijle nir, kami sisamis p̃ilngi taleve nevöt sopon, pirpel: Ni nga m̃ila nevöt nga milep p̃ilngi pilep, ko ni nga m̃ila nevöt nga welili p̃ilngi puwelili bbong, puto metmet. Suri poro pijki, devinuk ko taka-tipatun bbong nga taka-loli.

<sup>3</sup> Ko kaplingi kami sopor nga para-tori nevöt nen nir van Jerusalem e. Ko daron nga bea-luwi vinuk ko bea-uli naul sopor nga bea-wera suri nir tevi kalesia nga Jerusalem nir, ko bokonir van vajin.

<sup>4</sup> Ko poro ßelesi erres nga inu kele bean, ko nabkorkorti vises van.

*Norrormien se Pol suri sel sen*

<sup>5</sup> Daron nga ßeasi Masetonia vajin ko bevinuk ji kami vajin e.

<sup>6</sup> Ko rrek ßelik piprepriv sapon tevi kami, rrek ßelik pijpari daron ne melas pusuw. Vitunen ko kapa-meteni sel suk lat nga bea-van kele e.

<sup>7</sup> Sete numrreni ßelik beblen kobbong tevi kami, ko norrormien suk oto nga poro Numal pimarong ko inu ßelik piprepriv sapon tevi kami.

<sup>8</sup> Ko norrormien suk oto nga ßelik mun iel Epeas pianan pijpari nabong ne Pentekos.

<sup>9</sup> Suri sel etþir erres nga bololi majingen iel nga puloli majingen se Numal pian mare. Ko jinibb elep kele arok-tere inu.

<sup>10</sup> Ko poro Timoti piplari iok ji kami, ko kapmetmete þirres, puloli purnge þirres nga þilik tevi kami, suri okmajing se Numal se kerr kobbong erpe inu nomok-loli.

<sup>11</sup> Sete kami san puklu wutan re ni, ko kapwilwil ma sen nga þitajer malum re sel sen re demat, puloli sete putor sweri nanu nga ñikarkar, mian pijpari ni ko tasi kerr nir parluwi kele vini jik. Suri namok-teravi malume le.

<sup>12</sup> Ko re devjen ne tuwa kerr ngok Apolos, nuwrai lilane tevi nga numrreni wor pivivitu suri tasi kerr ngok nir nga parinuk parlesi kami. Ko ni setewor emrreni pivinuk. Rrek poro daron sen putoe ko pia-vinuk pia-lesi kami vajin.

*Bongsi nale se Pol tevir*

13 Kapmetmet p̃irres, sete kaplelea, ko kaptur p̃iterter rengo nosurien se kami. Sete kapmetutu.

14 Kaploli nanu jijle re sel ne merrenien.

15 Tasik ko jojik nir, kamrongwos pae jiljilw-eren ne Stepanas ko metka sen nir. Nir arivi m̃eri Akaea nga womu jerjer marlingi nosurien ser rengo Kristo, ko marok-p̃elak nga parwilwil se kalesia nir.

16 Ko inu numrreni lenglengge nga kaposurir p̃irres, tevi keke nir nga marmajing tevir.

17 Nuir temijpal nga m̃elesi Stepanas, Potunatas ko Akaekas. Nir ko arlai wani milnge kami ko arloli nurngo erres.

18 Arloli inu nolok eir luwi, erpe keke arloli pa nolo kami eir luwi. Erres kaposuri jinibb nga marirpok.

19 Ko gortien nir se kalesia nir nga Esia arwera erres tevi kami. Ko Akwila nuru Prisila tevi gortien ne kalesia nir nga marok-ser korti rengo naim ser armerreni lenglengen parwerai erres tevi kami rengo nise Numal se kerr.

20 Tasi kerr ko joji kerr jijle nir iel arwerai erres ser tevi kami. Kapwera erres tevi kami lululwi, tevi merrenien ko demat.

21 Inu Pol vajin, nula pensil ji m̃er nga mok-uli tweni nale suk ngel nir, ko nuli vajin 'erres' suk ngel tevi kami.

22 Poro san sete emrreni Atua, ko lolaren se Atua putu ren.

Erres wor Numal, ko sete pipriv ko kupluwi.

23 Ko nalol nga m̃irres se Numal Iesu piptevi kami.

<sup>24</sup> Ko merrenien suk piptevi kami jijle renge  
nise Iesu Kristo. Remse kami.

**Naul On Nga Mimerr Uripiv**  
**The New Testament in the Uripiv language of**  
**Vanuatu**

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

96303ce7-aa0a-513c-862d-415957a542e1